


# ETIINI YA YESAPELI

 Nikhale neemenle-ene okathi vakhani paahi, nimuxukhuruku Muluku mwaha wa yeela. Nuuramihe miru sahu.

Tithi ooreera murima ni Muluku Oowaarya, hiyo ninnitteeliwa murima saana Nyuwo okhala mu—Muluku, ni mukhaliheryo woowaakuveya okathi wooriipiwa murima. Hiyo ninnooxukhuruni mwaha wa etthu Nyuwo munniireny'anyu. Tthiri hiyo khaninwerya olavula, mmurimani mwahu, moota ninxukhurelahu yeela, ni moota Nyuwo munrwaanyu onoopola okathi onkhalaahu mmukattiyamihoni. Hiyo nooxutta, moovirani mwa miyaakha, woororomelani ni owaaminini Nyuwo.

Nto miyo kinnivekela, oxekuw'ola, Pwiya, wira mwaamwaraxele iparakhha Sanyu atthu ala. Ohikhale hata mutthu ootteettheya eriyari ahu muteko ola nuumala. Aakhanleene mmosa mu ohikhanle oratteene ni Muluku, Owerya omuhihimunxe Yesu mmahiye, ovahe ekumi irutthu saya sinookhwa, Pwiya, ni munepa aya, ni ahokoloxerye wa Nyuwo. Munivahe, Pwiya. Ale ahirina Erooho Yoowaarya, nla nikhale nihiku nimosa nuulupale awo ahinrowaaya okhalakhala eliyalaka, tthiri nikhale nihiku Muluku onaamwaraxelaawe Erooho Awe. Munivahe, Pwiya. Munilevelele itampi sahu.

Ninvekela wira mmureerihe Munna Sullivan, mpatthani ahu ooreera murima ni oophenteya, ni owuupuwelela wawe atthu, ni wiilipiha wira aaruuhele khula yooweryaneya owo onwery'awe, wira aakhaliherye. Kinvekela wira mmureerihe Munna Sullivan.

Mwaareerihe arumeyi mulaponi mothene, mapuro othene. Mwaavahe eyaattelo yuulupale, Pwiya. Wira awo ekhale voominyala vapulpitu ni elaleye Masu a Muluku, maana hiyo ninkhala iwoora sookiserya sa wahala a olumwenku ula. Mutthuniherye oreera Wanyu murima onikhuneele ni muuttutthi okathi ula. Vano hiyo ninvekela mwa Nsina na Yesu. Amen.

Mukilaathiki.

Nkireere woouxukhuruni nyuwo atthu, ni Muluku, mwaha wa yeela. Munna Sullivan t'upuwelelinhe. Moone, khiyaarowa okhala yoolikana Munna Sullivan wira yeeyo, tivo hiyo niitthokinhe ahu wira nikhale oolikana. Hiyo ninnooxukhuruni mwaha w'oreera wanyu murima.

<sup>2</sup> Nto, vano, wa yo—yoovaha ya mphento eyo...nyuwo khimwaarina yo wira yeeyo. Nnari, eyo khiyaatthuneya. Moone, paahi...awo aaliva soothuma, oteeli ni yoolya, nilyiyaahu, ni sothene saatthuneya. Masi kooxukhuru, oophenteya saana,

nto eyo enoorowa okhaliherya muteko wa omisiyonaariyu ni waaruuha atthu wa Muluku. Khonthummwa hata sikaro ni yoowo, hata wiskhi, hat'etthu ekhanle yoonanara, onrowa ovareliwa etthu yooreera. Ni kinvekela wira Muluku ahelele eyo mukonthani mwanyu osulu iwe, ni aacererye imaara ikonto muloko, khula etoolare, wala—wala esentaavo, wala isentaavo thanu nyuwo nvahenryanyu muteko ola.

<sup>3</sup> Nto, vano, kintthuna kixukhuru Muttitthi wa anakhotto a Estadu Unidu anitthunihenrye okhalana emp'ela wira nikilaathi, okhalana miteko iya s'okokhorela. Vekeekhai kinnaaxukhuru ni murima wothene.

<sup>4</sup> Ni ntoko sinsuwel'aka, Munna Sullivan ohimye wira itthu sothene sinoolinvwa voomalela. Khinihiyale hata epooma, nilokihiwaka esentaavo emosa, sihilinwe sothene; hiyo khininaamini tu wira enookhala enamuna ekina. Muhilokihaweke ni hata mutthu, muhaana okhala naxariya ni oowookowa. Ni mwaalokihiwaka ni mutthu, mmurowele mmuleele wira onnoolokihani, masi oovaheni okathi vakhani paahi, nto munooliva. Munnona? Okathi wothene, eyo ti yooreera. . . Eyo ekanyeryo yooreera y'oKristu: okhala naxariya, oohimya exariya.

<sup>5</sup> Muntthuna mukhaleke volikana ele enihimyanu. Yeenyu mwaahikhaleke, munwerya sayi owehererya wira mutthu mukina akhaleke, moone. Tivo nyuwo mwa ipaphelo soolempwa, sinisommwa n'atthu othene, vano kweekwe mukhaleke a nneema, naxariya, ekeekhai. Muhimyeke ekeekhai, voochala wira enoosikuliha etthu. Muhimyeke ekeekhai, mwa khula enamuna, okhala wira okathi wothene munoowerya ohimya enamuna emosaru khula okathi. Nto mwaahimyaaka etthu yoowootha, mwaahaana ohapuwa ikilomo emilyawu, ni nlelo muhaana othikela-tho wootha iwo; ni mwiirale etthu yootepa onanara. Mukhale a exariya paahi, ni munoowerya ohimya enamuna emosaru okathi wothene okhala wira ekeekhai.

<sup>6</sup> Ti siiso ni Bibilia. Muhimyeke siiso ntoko Bibilia onihimyawe, muhiisakaleliheke ni yeeyo, muhimeke siiso paahi, paahi. . .yoolempwa vaava va ni—ni munoowerya othoonya ni ekatha anyu yeeyo. Eyo ti—eyo ti. . .ti siiso munimuxinttanyu Satana. Satana aahimuhimeerya Yesu, “Nyuwo mwaari Mwaana a Muluku, niwooneni mpakakaka mwiiriirya. Eniriirya wira Nyuwo mwa 'namapaka miiriirya.' Mutatuxe maluku ala ekhale mukatthe, noone. Moovoliwa etala.”

<sup>7</sup> Owo khwira, “Masi yoolempwa, Mutthu khankhala mukumi ni yolya paahi.” Munnona? Owo aakunxe Masu a Tiithi khimuxinta xetwani, vaavale vene vapuwani vawe. Tivo nyuwo munoowerya wira yeeyo, omuxintta xetwani vapuwani vawe, ni Masu a Apwiya.

<sup>8</sup> Vano, miyo kweekwe kinoomuxukhuru Munna Sullivan. Nla ti...Kileveleliwe nuulumo nla: Kookupali wira okathi opakiwaawe Munna Sullivan Owo aaroohiya mphimo. Khaavo onlikana ni owo. Ori mutthu mmosa paahi otonko aka okumanana kookhalaru aakuupuxenrye Munna Sullivan, ari E. Howard Cadle. Nkisuwenle sinto aanimusuwela wala nnari, a o—o...Munna Cadle aari mmiravo ooreera murima a okuluttuni ntoko Munna Sullivan. Ni owo aahelaka matata mpoolosani mwawe vanci-ene mpakha oputthela mikhoyi sa ekalsa awe vathi saana, ni olavula ni muru awe orukunuwelaka epantte emosa, ni owo aari paahi E. Howard Cadle. Nto siiso miyo—miyo kinnitteetliwa murima okhalana Munna Sullivan ntoko mpatthani ni munna mwa Ehapari yooreera. Ni kinvekela wira Muluku amureerihe ni ekerej'awe ekhaani nno, amwaar'awe oophenteya, oophentiwa awe.

<sup>9</sup> Ni wa nyuwo, arumeyi akina muri va, wa nyuwo ni muthukumano anyu, alaleyi a Ehapari yooreera Yoomalela, vanihimmwa itthu sikhaani sa teekinika sa Soolempwa hiyo pooti oheemereryana mmosa ni mukhw'awe. Miyo kinniheemereryana ni amwaar'aka mwa itthu kamosa-kamosa. Ni nyuwo munnisuwela exeeni? Awo onaasivela mukatthe wa masa nto miyo wa serexa, tivo khanineemereryana. Ni kinimooleelani etthu eniirihaaka wawaka: Okisivela nipattuuxa na mukatthe wooviha wa serexa (waamukisivela naanaano va) ni oyeeherya manteeeka vasulu vaya, vano nto oyeeherya malaaso vasulu vaya; nto, munna, mookhalana etthu enreerela olya! Amwaar'aka annoova. Ni kinoona wira awo anoova ikaloriya. Waamwaasivela, masi moosuwela moota athiyana sikhanlyaya, awo anoova...Awo anikhala oohivaala vakhanlyanyu waattomeeryaka alufaneti ni waathikila vanikhuvani, ni nnakhala vo awo annitthuna o—awo annitthuna ovukuwa. Owo ti mukhalelo aya, woona waka, tivo yookhala...Ni, masi miyo okisivela. Vano, hiyo khanniiraana mwa yeeyo, itthu sikina niri saana. Masi, moone, hiyo khanihiyo oowiiraana voomalela. Vano hiyo naamoona etthu emosaru, axinna, masi etthu yuulupalex, hiyo ninkhuura mukatthe, eyo t'itthu yuulupale.

<sup>10</sup> Vanci-enexa, mwa opatiiso wa Erooho Yoowaarya, ni orwa wa Kristu, ni miixuttiho suulupale sa ehapari yooreera, ni sootthuneya sa Bibilia, tthiri niri niparari nniparari ni yeeyo. Ntoko oxinna muulupale wowiiwanana, oohikhalana mukaano wa muromolelo, woohikhala etthu ennikhoottiherya, hiyo nineetta nirowaka oKalvario ntoko muttitthi mmosa muulupale w'anakhotto, vamosa.

<sup>11</sup> Kawerya-ru okhala mukhaliheryo wa nyuwo, kinootteeliwa murima wira. Ni kookupali wira mwaamuhikimeerya etthu emosaru. Ni nyuwo pooti okhala mukhaliheryo wa miyo. Nto eyo etthu emosa mukhanly'anyu wiiraka, vansuwelaaka, okivekelela, wira Muluku ahikihiye khipuwaka. Miyo—miyo—

miyo...Khekhanle mmurimani mwaka ohapuwa, miyo—miyo kintthuna keetteke voolikana, kintthuna kiireke ele ekhanle yooreera. Okhala wira kinnisuwela, ntoko Munna Jack Moore aakihimenryawe emaara emosa, owo iirale, “Munna Branham, miyo nkaathuna okhala voopuroni vanyu ni musuwelelo anyu wothene, Nihiku na Olamuliwa, okhala wira Muluku onoorowa woovekelani waakhula wuulupale,” khwira, “okhala wira Owo ohaahela atthu imilyawu sene mmatatani mwanyu.”

<sup>12</sup> Vano, vakhala wira koosuwela wira kinoorowa weemela iwe kaakhule mwaha wa atthu ale, vano enamuna xeeni ya Ehapari yooreera kirinaaka olaleya? Ni exariya xeeni, kirina-ene othuma wa Ephome Awe mmatatani mwaka? Ni okhalaka wira Owo ookivaha yoovaha wira...voohihoverya, khula mutthu onuupuwela aamusuwela wira ehaana okhuma wa Muluku. Nto ni yeeyo, vaakhanle wira kaamweettiherya mutthu ephiro yoovonyeya mwaha paahi wo wira nikhuru khata niroohimya yeeyo, Muluku aamukiliviha mwaha wa yeeyo Nihiku na Olamuliwa.

<sup>13</sup> Masi okathi woonaly’aka yoowoona, nno woohikhala khalayi, nto khuwiiwa atthu ale okhuwela...Muhaakhela eliivuru anyu ekhaani nsana ohiyu? N—*Nsu* na Alipa a Nakoso. Ti yooreera. Ni mwa yoowoona...Nihiku nlo ninootthitta ni itthokiheryo sothene emosa-emosa; khemalenle. Masi mwa yeeyo, ni koonaka yeeyo, ni miyo keemenle vale ntoko—ntoko seemenly’aka naanaano va. Ni kaaniiweha kimmathale-ene vale voolilini, kaawehaka amwaar’aka, ni nlelo keemenle-ene vale kiiwehaka yoomi. Ni va yaari atthu ale yeemenle erukurenrye siiso okathi wiiralyaka, “Paulo ohaana olamuliwa mwaha wa Ehapari yooreera owo olaleiye awe?”

<sup>14</sup> Khwira, “Ayo.”

<sup>15</sup> Miyo khwira, “Miyo kilaleiye khula Masu voolikana ntoko owo silaleiye awe.”

<sup>16</sup> Nto imilyawu sene khukhuwela, “Hiyo nimmumula mwa Yeeyo!”

<sup>17</sup> Ti siiso kintthunaaka wira ekhale kalapuwela—ru iwe, moone. Kintthuna wira ekhale siiso, siiso paahi, voolikana ele Paulo ehimmyawe. Nkintthuna waacererya—Mo etthu emosa, okumiha—Mo etthu emosa. Ele Bibilia ehimmy’awe paahi, eyo t’inamuna entthunaaka wira etthikele erowaka, moone. Ni tthiri, mukhalihe siiso, miromolelo khula epantte sinoovenxa ekhottiheryo evirikanyaka Yeeyo.

<sup>18</sup> Vano nto, imaara sinci-ene, axinna anuupuwela wira miyo kirina nthowa ni axinn’aka. Muluku onnisuwela wira kahiyo siiso, vakhalaru wira Owo onnisuwela ele ekhanle ekeekhai. Munnona? Khanihiyo nthowa ni axinna, ti eyeettiheryo enniiriha ohikhala axinna. Kahi Masu a Muluku annikhoottiherya hiyo okhala axinna, ti eyeettiheryo eniitakanxahu—mo

ennikhottiherya okhala axinna. Ti yeeyo. Nto, ti yayi varinaahu weemelaka? Weemela mwa Masu, nto Muluku onimwaaruuha athu othene Vaavo (ti yeeyo) va—vaavo. Muhikhalakhale mutthokihaka, muhikhalihe muromolelo, mukhalihe mwa Muluku paahi, ni mutthikele mukelelaka ohoolo; nwehaka paahi woomalelani, mukhale oolipa, Muluku onooruuha ele enihala.

<sup>19</sup> Sinnikhalaka itthu sinci-ene munikiirelanyu, kinxukhurelaaka. Vano kawerya vale kinimookhaliheryani, koovahakani ekuwo ya mavekelo wala ethu siiso. Vano, muhikiokohe mwiixuttiho, okhala wira miyo—miyo nkinthuna wira eyo. Athu anci-ene annikilepela sookoha sa othelana ni omwalana ni siiso, yeeyo ekhanle yoowalamela mukereja. Miyo kweekwe kinnitthikelaka ohimya, ni wira, “Mmukohe pastore anyu.”

<sup>20</sup> Athu annikilepelaka iwarakha va ni wira, “Ankhi *ela?* Ni ankhi *ele?*” Miyo kinootikiha ewarakha, munimwaakhela. Munwehe pastore anyu vanaasiwa itthu sikhaani okhala wira, mwa sothene, owo ti makampusi anyu. Owo—owo ti—ti yoowo Muluku onveleelinhe awe wira ookhapelelekeni. Ni hiyo pooti oohiiraana mwa yeeyo, vano nto eyo yaamuruuha manyakunyaku mukereja mwanyu. Hiyo khaninthuna eyo. Nnari! Nnari! Hiyo ninthuna paahi wira muhiye wira itthu sikhanelle sa etampi, itthu sihikhanle sa mBibiliani, ni mukhale paahi murowaka wa Muluku. Munnona? Nto nyuwo mwakumiherya soohiiwanana ni itthu siiso, eyo ennihaaxa ekereja. Tivo, miyo kinamputi pastore anyu wooleelani sa othelana ni omwalana, n’itthu *iya* n’itthu *iye*, akhale yoowo oniira. Owo murumeyi a Muluku nave, ni t’olikana wira iire yeeyo.

<sup>21</sup> Munnimuupuwela muSamariya ooreera murima aamphwannye mulopwana aavulalihiwe? Owo khumuruuha vatthokoni vammaka aletto (ekhale ekereja) ni khunvaha mulopwana mwemmo musurukhu miili wa eparatha, ni khimuleela wira aatthunneru-tho mukina owo aammuliva aatthikaka. Tivo, owo ookhalana musurukhu miili wa eparatha, onniwerya wooloolani owo akhalaru mutthu a Muluku. Owo akhala mutthu a Muluku ori Mmasuni a Muluku, owo—owo ookhalana ele Muluku onvahalyawe: Erooho ni Masu. Eyo ekeekhai? Moota xeeni orinaahu okokhorelaka? Mwa Erooho *ni* mw’Ekeekhai. Ni Masu ti Ekeekhai. Eyo ekeekhai?

<sup>22</sup> Vano, kooxukhuru vanci-ene, tho. Nto vano, nkireere okhulumuwa, ni wooceya saana oxekuw’ola, nkinthuna-tho okhala mooteeli mukina kaakhalakaru mukumi. Niira nuulupale n’anamuhapaliwa, nto ohiyu wothene, amanasaka mikhora ni enyakulaka, n’athiyana... Oh! Miyo kaaroovenya paahi, ohiyu wothene. Ti yeeyo. Nto vano miyo—miyo nkinthuna-tho oteeli mukina. Kinoorowa omoteeli. Kinrowa ophavela

ekamiyawu wira kirupeke-mo, vate vapuwani nipuro nlo. Kinrowa ophwanya, ophwanya eheema ni murupa wo orupa, wala nipuro nimosa kikhanlyaka okhalaka mekhaaka, nipuro nlo. Ti yeeyo.

<sup>23</sup> Khireere etampi, elapo ela, kahi yooxankela! Yoolyiwa axiitthu, ni ti yoowuntta mpakha veerimarimani. Wenno nno nipuro nikina, estaatu anyu...Kahi estaatu yeela paahi, mapuro othene. Nno, miyaakha vakhani sivinre, miyo kaari o—vamuthukumanoni w’etiini nno ostaatu, epooma yuulupale. Nto ohiy’ule nikhuru n’anatiini, ekereja ortotoksa ni aximiravo, yaarina muthukumano. Miyo—miyo nkinatoko...Kootoko okhala wAfrika ni mwaatteepa vodu ni sothene, nkinatoko wiiwa etthu ntoko ele. Nto voosiisu aya, (Nkinwerya wooleelani oratta-ene, hiyo na muthukumano wootakanxeya)...ooriheleliwa vathi, itthu soohifayi saairiwe, isupha sa wiskhi mapuro othene. Nto aximiravo ale, amiravo n’axiruusi ekatthi emosaru ohiyu wothene, vamosa. Nto voosiisu aya, “phaatiri oowaarya” okilaanthe-ene vale, vano awo yaanirwa ni umukokhorela *siiso*. Vathi va Nsina na Yesu Kristu!

<sup>24</sup> Kiroovahuwa? Exeeni—exeeni enikiira? Nkinwerya tu ovilela itthu iyo! Eyo...etthu ennikikhaliha kapatti-kapatti koonaka yeeyo. Eyo enimuthoonyerya Pwiw’aka Yesu? Niira, na anamuhapaliwa ni itthu soohifayi si...yaawaranse aximiravo ale ni axiruusi, yiisaatalenle vathi ni ittanka sa ikokhola, ni isuupha ni...Oh, Muluku aka! Mwaamuwerya wiihana yeeyo oKristu? Khivanxankiha olumwenku okhanlyaya mmukhaleloni wa etampi. Ahe, natampi onihimya exeeni aawehaka yeeyo? Ikonto sene a yaawo.

<sup>25</sup> Axiruusi ale oohapalasiwa hata yahaawerya ovenya, ni okatthi ohiyu wothene ni aximiravo ale, ni moolumo oonanaraxa mutonko anyu wiiwa mookhalaru. Miyo kihela misaawu vamuru vaka so, wira kiphavele orupa. Vathi vale, oohapalasiwa, ni etthimakasaka nipuro nnipuro siiso, anatiini!

<sup>26</sup> Vano, kaamuwerya owehererya atthu ala anatampi ntoko, vano, aniisihana anamusewe, nno mmuseweni mwa poliixe. Mmosa wa an’aka aapacenrye weetta mpakha vapistani va poliixe, kaammukumiha mmuttettheni. Ah-ha. Eniitthaniwa musewe yeeyo, owo kahi musewe. Exeeni ela...Mwaatthunaka okhala oratteene, mukhale oratteene ni Muluku. Ekeekhai.

<sup>27</sup> Kintthuna koosomeleni, moolumo vakhani paahi a Bibilia. Munooophwanya moolumo ala vakhani kintthunaaka osoma va wa yosoma, amphwanyaneya kapiitulu 17 ya Mamwene Oopacerya, versiikulu 1.

...*APWIYA Muluku a Isarayeli akhanle akumi, yaawo kinaarumeelaaka, khunkhala okame nakhala epula miyaakha iya, ...mpakha vanrowaaka ohimya.*

Mamwene Oopacerya, ekapiitulu 1-...kapiitulu 17, versiikulu 1.

<sup>28</sup> Vakhala wira kinoowerya wooveleelihani ekuwo ya mavekelo, okathi owo, mukilepele paahi; sakartaari aka va, ori vaava vano, Munna Maguire. Akavi atonko waakhela ikuwo sa mavekelo wa hiyo? Nrowe noone ntata nanyu. Nvenye, Munna Jim. Miyo kintthuna koone e...nyuwo, ni amwaar'inyu nave. Va ori sakarataari aka ni amwaar'awe, ale anvara muteko, aveleelinhe...Owo ti mmiravo ni mwali anooveleelihani ikuwo sanyu sa mavekelo okhuma vamuthukumanoni, oowaili aKristu oowiiwahererya. Ni nsu, nsu nle naamukhaani noomaalelya muniwaanyu mutelefoonini mwakilikarela, owo ti mwaamuthiyana okilaanthe vale, mwaar'awe. Atithi awe ni ame awe, n'akina, ari vaava ni hiyo olelo; ni—ni ale oophentiwa, mapuro othene. Tivo...Vano nto nyuwo moosuwela wira sakarataari aka a vapuwani, Mwenye Mercier, Munna Leo Mercier, ori vaava nipuro nlo, ni Munna Gene Goad. Nto vano hiyo naweryaru wooveleelihani nipuro na mavekelo, khula okathi, etthu p'itthu hiyo nikhanlyahu wiiraka, woovekelelani mutelefoonini; etthu p'itthu enweryaahu wira, hiyo nnimwiira.

<sup>29</sup> Mulopwan'ola ni mukhalelo wootikiniha orina ekopo mmatatani, ni mavalo oolipa, maitho awe yaaryaka Ovuwa wa Muluku, ireru sawe siveveleyaka epantte ya yoowo, aivitikelenle nipattuuxa na mairi a epwittipwitthi, aavula mavalo oolipa okathi weettaawe ephiro arowaka oSamariya. Owo khaari ooreerela omuweha, masi owo aarina SIISO ANIHIMYA T'APWIYA wa elapo ele yuulupale ya Isarayeli. Ayo, Eliya muTixibi, profeta a Apwiya. Owo khaari ooreerela omuweha, masi aahikhalana Masu a Apwiya.

<sup>30</sup> Owo khoova weemela ohoolo wa mwene, okhala wira aahikhala Ohoolo wa ole muulupalexa onvikana mwene, owo aahikhala Ohoolo wa Yehova. Tivo, owo aanisuwela veemenlyawe. Ni okathi aaronwawe ohoolo wa mwene owo khakukumme ni otitirya, owo aanisuwela etthu aahimy'awe. Owo aaniwerya omuhimeerya mwene, "SIISO ANIHIMYA T'APWIYA MULUKU A ISARAYELI, 'Khenrowa okhala hata epula nnakhala okame mpakha miyo kiihane.'" Owo aahimenrye-ni yeeyo, "Mpakha miyo kiihane. Vootthariha nuulumo *naka*?" Okhala wira owo aarina Masu a Apwiya, owo aari profeta, ni profeta onkhalana Masu a Apwiya.

<sup>31</sup> Eyo etthu yootutuxa woona olikana wa Isarayeli a Waataana Wa Khalayi ni Amerika olelo. Oomaili aya yaari maloko maalupale. Oomaili aya yaahikhalihwi, ni atthu aya yaaphiyale iwe, mwaha wo olupatthiwa wa etiini.

<sup>32</sup> Isarayeli aahilupatthiwa ni Farawo ni aahikhala mw'epothhani miyaakha imiya sene, weiwo yakhoottihiwaya omukokhorela Muluku eekeekhai ni mukumi, ni

yaahikhoottiheriwa mureerelo owo; ni yaahikhala ipottha. Masi Muluku aahaamanela natiri mBibiliani mw'Awe, wala Mmasuni mwAwe, ni ni maprofeta Awe, wira Owo aamwaavaha elapo. Ni awo yaahirwa elapo yeela khuwoomola alipa-ookhala elapo eyo, ni yaahikuxa muxovo aya, okhala wira Muluku aahikhalana ethhunelo yo wira yeeyo.

<sup>33</sup> Ni ti siiso elapo ahu ela yuulupale. Hiyo nirwiiye nno, ni oPlymouth Rock elapo ela khukhalihwiwa mwa otaphuwa w'etiini okhala wira axitiithi ahu oopacerya yaarootthyawa olupattha wa oRooma wa eyeettiheryo ya vano ya Yesapeli, ni yaahivira moolupatthiwani wuulupale ni okhwela okokhorela vathi wa eyeettiheryo yoowootha ya Yesapeli. Ni voolikana ni Bibilia, wa Wiisuupulula, kapiitulu 13, Muluku aahaaleiherya maasi mothakoni, ni nipuro nimosi, okhala wira muthiyana aaroihiwe mothakoni memmo aalyihiwaawe okathi, okathi, ni okawanyeya w'okathi. Muluku aahimmanela natiri Amerika, wala ekereja (muthiyana), wira orwe elapo ela.

<sup>34</sup> Mooweha Wiisuupulula 13? Inama sothene sikina saakhumme mphareya, maasi; Wiisuupulula 17:17, ohimnye wira, "Maasi moonaly'anyu ti eyaattelo ni mittitthi sa athu." Inama sothene sikina, saakhumme mmaasini, eyaattelo ni mittitthi sa athu. Masi okathi Estadu Unidu okhumelenlyawe, "Owo aakhumme vatthayani yahaakhanle athu." Ni muupuwele, vakhumelenlyawe, aakhala ntoko mwaapwittipwitthi mwaamukhaani.

<sup>35</sup> Vano, mwaapwittipwitthi orina manyaka maili, nto iwo owerya w'athu ni w'enamukottho. Masi viraananse aya, muupuwele, vano mwaapwittipwitthi owo aalavunle ntoko ehanasi owo ohinatthi; vano ehanasi aari Rooma.

<sup>36</sup> Okathi ehanasi yeemenlyaya ohoolo wa muthiyana wira emmirye mwan'awe ayariwakaru, ehanasi yooxeerya... Taani eemenle ohoolo wa muthiyana Isarayeli, wira emmirye Mwaana Owo ayariwakaru, ni khuveleeliha olupattha khuwiiva anamwane othene okhuma miyaakha miili orowa vathi? "Rooma, ehanasi, yeemenle wa muthiyana wira emmirye mwan'awe ayariwakaru."

<sup>37</sup> Vano nto, ninniphwanya wira elapo ela ekhumenle ntoko elapo yootaphuwa, ni yaari...yaarina mwaapwittipwitthi, yeeyo enihimya Mwaapwittipwitthi a Muluku. Masi, nuvira okathi vakhani, mweettiheryo yoola hiyo nrinaahu, waalavunle ntoko ehanasi ni yaahipaka owerya wothene ehanasi waarinaaya owo ohinatthi.

<sup>38</sup> Anrowa voottharana, emosa ni ekina, voolikana. Ni muupuwele okathi ala...Isarayeli aarookhumelela khukuxa elapo awe ni oPalestina, khuwiikara othene yaakhala elapo ele ni khukuxa elapo ene. Hiyo niroophiya khuwaakha aHinti, khuwoomola khukuxa elapo ela. Muluku ohaana ethhunelo



ya yeeyo. Muluku aarowa wooniherya olumwenku etthu Owo aawery'awe wira ni ni—nikhuru nikhaani n'atthu yaathuna otaphuwa, ni otaphuwa wa etiini, wira emurumeele Muluku.

<sup>39</sup> Irihiwe exeeni Isarayeli? Owo aahimukhalaha Isarayeli elapo yooweryexa molumwenkuni, ni owo aakhanle siiso mpakha owo okhuma mwa otthuna wa Muluku. Owo iirale exeeni ni Amerika? Owo omukhalinhe elapo yooweryaxa molumwenkuni mpakha vankhumaawe m'otthuna wa Muluku. Oolikana, mmosa ni mukwaawe, oratteene.

<sup>40</sup> Okathi Isarayeli ophiyalyawe mmuttettheni, awo yaari a—atthu aalupale okhala wira awo jaarina ohooleliwa wuulupale. Awo jaarina axilopwana yaamoova Muluku, ntoko Davidi, Mwene Salomoni. Olumwenku wothene waaniwoova, ni yaanipuha mureerelo owo woohikhala ikhotto, nnakhala mikattiyamiho, ni ekhalaka vathi va owerya wa Muluku, mpakha atthu a molumwenkuni mothene woosuveliwa yaanirwa owoona. Muluku aahaavaha yoovaha ya olamula sa mmurimani, yaari mwa Salomoni. Ni pwiyamwene a Okuusini, okhuma . . . pwiyamwene a oXeepea aahirwa aviraka Mothakoni mothene wa Sahara (aahimala miyeeri miraru) wira iiwe paahi osuwela wa Salomoni. Nto voonaly'awe wira Salomoni aaniwerya olamula iroho, ni khumusuweliha isiiri mmurimani mwawe, owo iirale, “Sothene kiiwalyaka sa nyuwo saari ekeekhaii, ni voowaatta.” Owo aahikupali wira ole aari Muluku.

<sup>41</sup> Ni Amerika, vasulu va mulipiheryo w'axitiithi ahu oopacerya jaarwiiye nno mwaha w'otaphuwa w'etiini . . . Naahikhalana atthu ooreera murima mahiku ale, akhulupale ntoko ahooleli: George Washington, Abraham Lincoln, axilopwana a mukhalelo wa murima woottittimiheya, atthu a Muluku. Amerika aari Amerika, mahiku ale.

<sup>42</sup> George Washington, nno oValley Forge, owo ahinatthi omulapuwa Delaware, aahivekela ohiyu wothene, mpakha owo onaana mpakha muyuununi, akokhoraka vanakhutuni. Nto voosiisu aya okathi atthu a wAmerika apacenyaya olapuwa, yaari paahi oophiyaka ipursento miloko miili a yaawo jaarina ixapattho wira ewarase, Anakhotto a wAmerika. Masi awo yaahikhalana muupuwelo, awo yaahikhalana etthu yaathuneya wira ewanele. Awo khayaacala jaarwa wala jaarowa. Alimi yaahirwa, khuhiya olima ni khutaphula emompe awe, vano khimukuxa rifle awe khurowa owanela ele aasuwelaawe wira waari otaphuwa. Nto mmeeloni mwaya, kookupali wira yaari yeeyo, ipholovolo xexe wala thanu, ipholovolo sa mosikeete, khuttyuula ekasako awe ni exapheyo nave khuhimukwannya.

<sup>43</sup> Axilopwana a Muluku, yaawo apacerinhe elapo ela, atthu aalupale! Khivanxankiha awo alepanse aya:

Elapo ahu elokele yaaryaka  
Ni muthuko woowaarya wa otaphuwa,

Munikhapelele ni owerya Wanyu,  
Muluku muulupale, Mwene ahu!

<sup>44</sup> Okathi vakhani ovinre, kaahilavula ni mulopwana mmosa mutokweene oCorydon, Indiana. Owo khukileela okathi kapitolio waary'aya oCorydon, ni moota owo...khuhimya moota owo aaronwaawe mukaaroni ya inyompe wira amwiiwe ku—kuvernatooro olavula. Ni owo ni kuvernatooro yaari aili paahi yaawanre, ifaato, ya ipeesa piili. Khwira wira owo aarookhuwa ipwittipwitthi ni khumettha, khurapiha mairi aya, axirokor'awe khurukunxa khumpakela ekasako wira owareleke ekalsa awe. Nto mutokweene owo okilanthene vale, ni oophiyaka miyaakha miloko mithanu na miraru ni mithanu wala miloko mithanu na mixexe, khookola ireru sawe *saale*, nto khwira, “Billy, owo okathi *Ameriki* aaryawe *Ameriki*.”

<sup>45</sup> Miyo khunweha mutokweene owo, nto kuupuwela, “Mmiravo, nyuwo, anci-ene w'amwaavano ala khayaarowa waamini, masi nyuwo munihimya ekeekhaii.”

<sup>46</sup> Exeeni emukhumelenle Isarayeli nuumala wahala ola othene a nttittimiho? Awo yaaroopacerya ohicaliwa. Awo yaaroopacerya ophiyera nipuro awo, ahe, yahaacalaya yiiraneya. Awo yaaroopacerya ohiipasooa mwa omukokhorela waya Muluku, anaamwi yaavarelela enamuna emosa ya etiini siiso hiyo nirinaahu. Awo yaahikhalana enamuna ya ettittimiheryo. Masi awo yaaroopacerya ohiipasooa n'atthu aya, ni—ni khupacerya okeliha-mo ithiru soohiyana-hiyana mukereja mwaya. Okokhoreliwa wa Payaali khupacerya wiikeliha-mo, ni Isarayeli khuvahuwa mwaha wa soopuha, khuhapaliwa, ni ithu ntoko seiyo, nto vookiserya khimukeliha muhooleli mmosa ahaamusuwela Muluku; Akhabi, yoowo aamuranttenle tiithi awe. Ni tiithi awe aari mutthu ootakhala, mutthu thaaciri, masi mutthu ootakhala. Ni owo aahiira itampi sothene, onvikana mutthu ti mutthu owo ohinatthi. Masi Isarayeli, mwa opahuwa waya wo ohapaliwa, yaamukelinhe mutthu siiso, ni khimuhela veehiceni wira aarumeke. Awo yuupuwela wira yaari saana, siiso ntoko atthu anci-ene a wAmerika aniiraaya olelo, “Owo mulipa a poliitika ooreera murima, vano exeeni evirikanne? Khenrowa ovirikana, okhala wira owo napoliitika oophwanelela.”

<sup>47</sup> Atthu anci-ene a wAmerika, anci-ene aya, aatumihia ihaakhi saya sa eyuulupale, ntoko mutthu a wAmerika, ni aniira, “Envirikana exeeni, vakhalaru wira munnaakhela itoolare sikina vakhani wa kuveerunu ni munakhala?” Awo ahiitumiha mwaha wa erukulu, ni soowunlela ni soothuna sa olumwenku wa etampi, khuliyala etthu ene hiyo ekhuruwenlaahu oPlymouth Rock. Awo aaliyala yoorithi, ni aarowa khwiitumiha wa mittitthi soopahuwa mwaha wa soopuha. Ntoko saaryaya mahiku a Isarayeli, siiso yookhala, Amerika okunxe ephiro emosaru yeeyo, ephiro ene yeeyo, opuha!

48 Nuvira okathi vakhani, kuveerunu khukhaliherya etampi: “Vakhalaru wira mwaahikhalana mpaani moothukumana, exeeni yaavirikanne?” Eyo vekeekhai t’ile Amerika iiralyawe. Ni niroopacerya wiitthokiha mmansihu ni opaka makhuru makhani ni oothekaxa, oothekaxa, oothekaxa. Hiyo naakhanleru ni miyuupuwelo sene nikhuruwenlaahu nno! Etampi eroopacerya wiipurulela mukereja siiso ntoko yiiraly’aya okathi ule. Athiyana khupacerya omettha maihi aya, owara ikuwo soohifayi, athikilaka khula mwaakha ni. . . Ni alopwana khupacerya wira *ela, ele*, ni *ekina*, n’uttikha iturufu ni okhalana a musewe a bunco mukereja, ni a molumwenkuni saana ntoko ale saaryaya, oopahuwa mwaha wa soopuha, oovahuwela ohapaliwa.

49 Arumeyi asomaka oseminaariyu, ni pixipu airaka, “Mulaleye, amiravo, khula etthu entthunanyu. Vanikaasa miyo, ephome ya Yesu Kristu ehuuma miyaakha ekonto emosa ni imiya thanu na xexe sivinre.” Mpakha ekereja ophiyerya ohikhala etthu woohikhala mutthenkeso, ntoko elooca. Muhikhalakhale muliyalaka oxekuw’ola! Eroophiyerya okhala elooca, olumwenku oroopacerya wiikelihya-mo, arumeyi khupacerya wiisakaleliha siiso ntoko siiraly’aya mahiku a Akhabi. Anatampi, oowuntta mpakha veerimarima, ni yokelela ohoolo erowaka voowaakuva ntoko saaweryaya.

50 Onaamwi Muluku aavelelihenrye profeta nuumala profeta, ni omoriwa ikharari woosivela Owo aahaavekela atthu, vano awo khurukunuwela ettuli Yeeyo. Awo yaatthuna mwa enamuna aya, awo yaari aSarayeli, awo yaari ootaphuwa, awo yaari elapo yuulupale, axitiith’aya yaahiira *elexe ni elexe* (Davidi ni Salomoni), awo yaaniwerya wira etthu yaatthunaaya. Etthu emosaru hiyo oniilipiheryahu-vo, voolikana; etthu Washington, axitiithi ahu, ni etthu awo yeemereny’aya. Masi, munna, hiyo niri ikilomo emilyawu wa ithu iyo; ikereja sahu siri, ikilomo imilyawu sene.

51 Ya khalayi. . . Ekereja Metotista olelo, wa ele ekereja Metotista yaakhalakaaya! Ele ekhanle ya Pentekosite olelo, ni ele yaakhalakaaya! Ele ekhanle Patista olelo, wa ele yaakhalakaaya! Naarina okathi w’otthika nilavula sa John Smith ni anci-ene a anamarehererya ale oopacerya. John Smith iirale, ahinatthi okhwa, iirale, “Etthu yowoopiha okhala wira athiyana aMetotista anoopacerya waawara anela a eweero mukathani mwaya.” Metotista! Owo aarowa ohimya exeeni olelo owoona awo maihi aya oometthiwa, wiipintari wiitho waya wothene, yaawaraka akaputtula? Mwaha wa etampi!

52 Muluku iirale exeeni wAmerika? Ovelelihenrye muhakalaliho ni muhakalaliho, muhakalaliho ni muhakalaliho. Arumeyi annilaleyaka Masu, aaphavela owiitthana atthu otthikela wa Muluku. Nto awo yiirale exeeni? Etthu

emosaru Isarayeli iiralyawe, arookhoota Eyo! Aroonyemula! Awiitthanne “masantu oophirikeya”! Khwaahela mukhatteya!

<sup>53</sup> Vaakhanle wira mmosa wa axinn’aka athiyana ni mmosa wa axin’aka alopwana, a ekereja ela olelo, aahikhala oteeli ole nsana ohiyu khuvenxa matata ni khimuttottopela Muluku n’ukhuwela okatthi iwe, awo yaamukhala mukhatteya olelo mwaha wa yeeyo. Masi nikhuru, na ananvahuwa oohapaliwa alolo “atakhalai oophirikeya” anoowerya okhala iwe ni onyakula ohiyu wothene; ni oohapaliwa, ni otakhaliha ni waarula ikuwo athiyana aya ni wira soonanara, n’umorela vathi n’onyakula ohiyu wothene, ni awo hata khakhanle ohimyaka nuulumo nimosa mwaha wa yeeyo. Khivanxankiha nilamuliwaahu vathi va ntata na Muluku!

<sup>54</sup> Nwehe, khula okathi, Muluku aahaaveleeliha arumeyi, aahipaka ithoonyeryo ni mitikiniho, ooniheryaka Masu Awe. Nto vootepaxa wa mwaha, anci-ene w’anamukuttho a vano arookhoota Eyo khunyemula khula muhakalaliho. Ntoko ele eniihaniwa Ekereja ya Kristu n’akina, “Mahiku a miiriirya aavira.” Yiilipihaka vanweryaya wira esusihe eyo w’ale vakhani oohala a Muluku. Ntoko saaryaya wIsarayeli, ti siiso eryaya olelo. Imaara sinci-ene, Muluku ohaana waakumiha athtu Awe mmitthenkesoni mmo ni miromolelo, waakumiha mothakoni meekhaaya, wira olavule ni yaawo. Ni Owo onoorowa okhalana oohala, muhixanke mwaha wa yeeyo. Owo aahikhalana wu, Owo onookhalana olelo. Yaahitthikela erowaka yiiraka etampi, ahunyaka mwa itthu seiyo. Mwaha wa xeeni? Ohooleliwa waya, khiyaavo etthu wira yeemexe.

<sup>55</sup> Ahe, ohimya exariya, miyo kinnisuwela ilapo sinci-ene aniira yawoonaru athtu mphironi awanre-ene ntoko siniiraahu wAmerika nno, yaamwaahela mukalapooso. Okathi waaronwe aka oSantu Angelo, oRooma (Vano, muupuwele yeeyo, yoomoraxa ntoko eryaya.), yaahikhalana nipawe iwe, waattamela mmuttuphani mwa Santu Angelo, “Athiyana a wAmerika: Xontte nwarase ikuwo wira mwaattittimihe alipaoohkwa.”

<sup>56</sup> Yaakhanle-ene etthu enoonanarihani, onkhala woona nikhuru n’athtu aniitthaniwa a wAmerika ovolowa. Miyo kaarookilaathi, oLausana, naapuha enama, nihiku nimosa, Munna Arganbright ni miyo. Mmeeloni mwaya, naahitthika okhala wira yaari yoolya yooreera. Kaaniwerya ophwanyanya maasi iwe, awo khiyaarowa ovaha etthu ekina woohikhala eviinyu. Nto miyo kaaveka maasi, kaahaana okuxa exaaro ya maasi vathi va moonoo aka, okathi wothene, okhala wira awo khayooovahani maasi vameesa. Vano kaahivolowa mme, nto itthu sothene saari sooreera mpakha “Muhano Amerika” ovolowa ni mwalapwa mwaamukhaani poddle, oottakatta ni oothowa naasi; ni maniya manci-ene owanre a mulooa wa isentaavo muloko *siiso*, ni sikaro oorakama aakhuma *sa*, khukilaathe vale

aipakaka okhala etthu ahaari-awe; ni khumpweha mwalapa ole poddle vameesa, ootakatta, etthu yoonanara.

<sup>57</sup> Eyo e...mwalapwa etthu yootepa onanara Muluku onihimyawe. Ni hata ehilinveweke yanamuloko ni ya yoowo mpaani mwa Muluku. “Eri ntoko namuttompe, ya namuloko ya namuttompe,” Bibilia oohimya. Ni, nnakhala vo, awo ari vo. Awo anootthara inamuna s’okhottiha oyara ni oliva, voo halela ophiya, itoolare ekonto emosa mwalapwa mwaamukhaani; ni omuroiha mapuro othene ni onvaha mphento wa mwaana, wira aweryeke weettasa ohiyu wothene, ni otthara inamuna s’okhottiha oyara.

<sup>58</sup> Exeeni enlipeleliwa woohikhala ehononeyelo! Nyuwo pooti ohiwa-tho nsu naka, masi kintthuna wira muupuwele ela: Hiyo niri woomalelani!

<sup>59</sup> Iwe, hiyo ninnoona etthu yaakhumelenle, etthu yiiraneieye. Vookiserya, khuphiya ewoora *yuulupale*: Akhabi aahithanliwa, nto vairaly’awe siiso, owo aamuthenle Yesapeli; muthiyan’ole oowuntta amweettihenrye Isarayeli othene waakokhorela amuluku a ethiru. Nto siiso Isarayeli iiraly’awe wu, vano, ela...Awo yaahaana wira ekhanle-ene mmukhaleloni wo ohiya waamini, wira etthuniherye etthu siiso wiiraneya mulaponi mwaya. Ikano simpakiwa n’atthu wa atthu, ni hiyo nihiira etthu emosaru!

<sup>60</sup> Waahikhala okathi Amerika ahaarowaawe okhalana... yaanisuwela wira khiyaakhanle omuhiyaka namuttompe a khalayi, namararuwa a khalayi owunrye ephome ya ale okhwelela waamini, khuwiiwakasa, ni etthu yaathyawenle aya wenno, wira etaphuwe, awo khiyaarowa ovilela etthu siiso. Eyo enooniherya wira niri mmukhaleloni w’otthikela ottuli, elapo yothene, othanla etthu ntoko eyo. Oh, vekeekhai, vano nyuwo... amosa-amosa a nyuwo aTemokrata oohihiiheya munrowa wuupuwela ela, wira “Oh, ahe, owo—owo—onookhala mukhulupale ooreerela a poliitika.” Eyo khino enimwiiweya vooreerela otthokelela, wa muupuwelo w’erutthu. Masi wa Masu a Muluku ni muupuwelo wa erooho, eyo khenaa maana. Vekeekhai kherina, itoolare sikina vakhani ni othikiliwa wa mipoosito wala etthu siisa.

<sup>61</sup> Ni hiyo ninvira okathi woorika, mamisiyonaariyu ahu opuwani olelo, okhala wira vano hiyo ninihimmwa okhala elapo y’Ekatoika. Vano, vekeekhai, Ruusiya onihimmwa okhala komunismu okhala wira awo arina muhooleli mukomunista. Xiina Ooxeerya onihimmwa okhala komunista okhala wira awo arina muhooleli mukominista. Hiyo nnihimmwa okhala aKatolika okhala wira nirina muhooleli muKtolika.

<sup>62</sup> Oh, okathi Akhabi aary’awe veehiceni... Nyuwo muniira, “Owo ori veehiceni.” Ti yeeyo, masi Yesapeli aari muru ottuli wa ehice ele. Owo taari ole aahoolela. Nkawehani

moota owo aakunxawe malamulo ene a mmuttettheni khuvirikanyiha voomalela, ni wira emureerele yoowo ni wunlela, khumukhanyererya Akhabi wira aire okhala wira owo aatheliwe ni yoowo. Nto ti siiso ni muhooleli ahu olelo. Miyo nkinihimya wira owo kahi mutthu ooreera murima, masi nkawehani etthu eri ottuli wawe: namuttompe, etthu ene yeeyo hiyo etthawenlyahu nno (okhala Amerika); ikano imosaru Amerika otekiwaawe-vo. Hiyo, mwaha w'othanla wahu wootaphuwa, niroothanla etthu ntoko yeeyo.

<sup>63</sup> Vano munnoona mwaha wa xeeni nsu naka ninrowaaya omaalihiwaa vahilekenle. Masi mutthu onoorowa osuwela! Ayo! Mwaha wa xeeni? Wiisuupulula 2:20, owo iisiitthanne “profeta muthiyana.” Nwehe paahi niwipi na etampi ninrwa vano. Nyuwo nwehe eriyari aya moota enrowaaya mpakha veerimarimani. Nwehe omwaavano, nwehe itthu soonanara wiiraneya mmakerejani. “Nto, vookiserya, onimoorwa olupatthiwa,” Bibilia onihimya siiso, SIISO ANIHIMYA T'APWIYA! Vekeekhai, onookhala.

<sup>64</sup> Vano exeeni enrowa okhumelela? Ntoko siireiye aya iwe, siiso enimwiiraneya olelo. Owo aari owerya ottuli waya, owo aari ole eettiherya. Musome e . . . Kookupali wira ti thanu na piili . . . ntoko kapiitulu 17 ahiiso kapiitulu 18, vaavo, munoophwanya etthu Yesapeli iiraly'awe: moota owo aamukunxaawe Akhabi, ni owo khuhinawerya ohimya etthu ya yeeyo okhala wira aari mwaar'awe. Nkawehani etthu elapo yaalipiheriwaya-vo okathi uwo, mwIsarayeli ootthikela ottuli ni mwaara pakawu (ottuli wawe) yoowo aari mulipa-oomukokhorela Payaali. Nto owo iirale exeeni? Vookiserya owo aakhalinhe sothene sa vano, ni sooreera saana, ni athu yaanikhalana vookhweya-vo, mpakha ekereja yothene wootothiwa ni yeeyo, alaleyi ni sothene. Eliya khaahimye wira, “Pwiya, ti miyo paahi kihanle”? Ni siiso saaryaya iwe, ennilikana ni olelo.

<sup>65</sup> Othene aya yaanoova ohimya etthu. Kahi etthu emosaru siiso olelo? Awo yaanoova ohimya etthu. Tivo ninnoona, wira awo khayaapasoopale, yeettaka voohiloka, oohapaliwa, yiiraka soonanara, oovahuwa mwaha wa soopuha, ni itthu sothene sikina, siiso ntoko siry'aya olelo. Yesapeli arukunxaka Soolempwa iye . . . Exeeni owo . . . wala malamulo ale, moota—moota Yesapeli onrowaawe orukunxa. Muupuwele, Yesapeli, owo oniisihana “profeta muthiyana,” aaweryeke athu, ni onihimya wira owo ti “nsu nimoso paahi na Muluku mulaponi.” Owo onimwiiraha muupuwelo w'erutthu waamini yeeyo voohihoverya.

<sup>66</sup> “Onimoorwa okokhoreliwa wa muthiyana, wEstadu Unidu, nto owo onrowa okhala Maria.” Miyo kihoona, miloko miraru . . . 1931. Itthu thanu na piili saahiiraneya. Miyo kookhalana vapapheloni va, ni miyo, koolepa 1931. Moota kaahimmy'aka wira “Mukhulupale ola, Franklin D. Roosevelt, owo onimwiiraha

olumwenku wothene, onookhaliherya wira, onookeliha olumwenku mukhottoni.” Khuwaaphin’ye mukhottoni nlelo, okathi wa ethowelo. Miyo khwira, “Ethu ekina, . . .” Nto ame aka, Temokrata oohihiiheya, yaahikiweha voolipa-vo okathi ohimye aka yeeyo. Miyo khwira, “Miyo khenikicala sinto aari Repuplikaano wala vakhala wira aari Sosialista wala onakhaleru exeeni, ela ti SIISO ANIHIMYA T’APWIYA.” Nto miyo khwira, “Wiiriwa yeela, anrowa otthuniheriwa athiyana omwiira mwaathanle. Ni yairaru yeeyo, anrowa okumiherya otakhaliwa wuulupalexa elapo ela etonko aya wira.” Ni miyo khwira, “Nihiku nlo awo anooliva mwaha wa yeeyo.” Vano awo yaahira mwaathanle ola ookiserya. Ti yeeyo emuthanlale, athiyana.

67 Ni nyuwo atthu ooreera murima ooriipa, Okuusini, moota muthanlale anyu! Nyuwo muniira, “Kuhiyo mwaha anyu nyuwo ohimya eyo vapulpitu.” Oh, ayo, mwaha aka, awo Masu a Muluku! Ni nlepa na—na Abraham Lincoln, ole ootaphunleni, niri iwe mmusewuni mmwe vavestiituni va muthiyana, nto nyuwo muntumiha ehaakhi anyu ya eyuulupale. Wuuliha muru.

68 Ni nyuwo atthu, mwaha wa ipoliitika, okhala wira nyuwo mwa Temokrata ooreerela, muthanlale mwaha wa ethu siiso, khutumiha ihaakhi sanyu s’eyuulupale omwAmerika ni oKristu, wira mmunye namuttompe onitthyawelinhe elapo ela, enikhalinhe ele naari-ahu. Munnoona moota onkelaawe ni mwiitihho? Vookhweya-vo saana, mpakha va owo ori veehiceni. Vekeekhahi! Ehice ya Empa Yootteela.

69 Nwehe! Vaamala . . . Muhoona nihiku nle sa ixikola s’eKatolika ni ixikola Prustante? Ankhaliherya exikola Katolika nave khankhaliherya Prustante. Munnona? Oh, munna! Nwehererye niwipi na itthu sinrowa orwa vano. Nwehe, nto vairaly’aya siiso, nkawehani ethu ekhumelenle. Etampi ela yothene ethukumanyeyaka. Yoophiyerya nipuro ni yookhalaniwa elapo mwa mukhalelo yoowo woophilpa.

70 Miyaakha vakhani sivinre, vaakhalaniwaya . . . aPentekosite arookhumelela voopacerya, yaahoopola elapo iyaakha vakhani sivinre okathi Al Smith aarowaawe otthyawa. Amerika aahisuwela saana nto. Masi Pentekosite khuphiyerya okhalaxa a molumwenkuni khukela mmwe khutumiha ihaakhi saya ntoko aKristu, wa ipoliitika, ipolitika sinrowa ohoolo wa Bibilia. Oh, wulu!

71 Vano, minuutu mmosa paahi, nto nwehe enrowa wiiraneya. Vano, hiyo ninnoona ethu awo yiiralyaya ni itthu awo yiiralyaya, hiyo ninnoona eyo elikanaka va oratteene, etampi mapuro othene. Yesapeli oookela, khwaalowa atthu othene. Ni nwehe, vookiserya, owo khupacerya omutekela mapuro maalupale oowaarya Payali. Eyo ekeekhahi? Nto anamukuttho a

Payali khurwa okhuma mapuro othene wira akele nipuro nenlo, ni khupacerya oraviha mittetthe omukokhorela Payali.

<sup>72</sup> Nwehe moota awo yiiralyaya, nwehe moota awo yiikelinhe aya. Itthu paahi yiiralyaya, nwehe varyaya olelo. Nkawehani eKatolika emiryaka, emiryaka, emiryaka; annithelana, annithikila ela, vekeekhai yeeyo Daniyeli ohimmyawe wira yaamwiira. Eyuuma n'uloko khasinrowa otakanxana, masi antakanxa ipyo saya emosa ni ekina, wira ethikile. Khula mwali muPrustante ontheliwa ni mmiravo muKatolika ohaana waalela an'awe aKatolika. Sothene siiso, athelanaka, atakanxanaka, siiso mpakha ophiyerya nipuro Estadu Unidu onsareyaawe axiitthu.

<sup>73</sup> Ninrowa wira exeeni ntoko mamisiyonaariyu, nirowaka iwe waataphula atthu a wAmerika a Okuusini ni mapuro othene a molumwenkuni, Tommy Osborn ni awo, ephavelaka waakumiha atthu mw'epakawu nave awo eweryaka onithoonya mwaha wa muhooleli nimuthanlale ahu, ni etthu emosaru. O Muluku. Exeeni—exeeni enrowa okhumelela olumwenku ula? Yaahaana omutatha khula mutthu mu. Ninrowa waakhula sayi? Misiyonaariyu onrowa ohimya—ni awo yaairaka, “Nyuwo munrwa nno onivuluxa mwa yeela, nave atthu anyu yeenyu ahenle etthu emosaru muskritooryu mwanyu iwe, veehiceni”? Ninrowa sayi. . . Exeeni. . .

<sup>74</sup> Mphavele mmakukhuni mwa wahala, murowe ni moone vakhala wira—vakhala wira mara, ti yoohalela, yoohilikana ni malamulo eyo okhala. Awo khayaarowa wira iyaakha sivinre masi, moone, hiyo nootumiherya ihaakhi sahu s'eKristu ipoliitika, ni ti siiso xetwani onikelihaawe-mo. Akhabi khaari hat'etthu woohikhala mwaatteepe a Yesapeli. Ti yeeyo enrowa okhala ela, mwaatteepe paahi. Owo khonrowa wira mmansawe, masi eyeettiheryo ele ottuli wawe enoomusukhumela mwa yeeyo. Vekeekhai voolikana! Mutite muupuwelo anyu, nyuwo muKristu. Nvinye, vahooxa ovikana sinuupuwelaanyu. Mukhalelo hiyo ory'ahu-mo, mukhalelo awo yaary'aya-mo, ni moota awo aphiyenryaya ohipasoopa.

<sup>75</sup> Moota murima wa mphento wa Muluku wiiraaya okhuwenle-ene, ni wunla, owoonaka atthu Awe mamisiyonaariyu. Aakhalinhe ethoonyeryo, ilapo sothene sirwaaka mapuro othene okhala wira Muluku ahaareeriha, mwaha wo owoona wiiwanana, mwa erooho, emurumeelaka Muluku. Vano nto wuupuwela wira Owo—Owo aaniphavela owoona otthikela ophenta waya woopacerya ni wira ele ekhanle yooreera, masi voohihyererya awo yaanirowa ottaiwene, erowaka, erowaka, mpakha vookiserya Yesapeli okela. Tthiri ti yeeyo hiyo niiralyahu. Niroohiya ikano sa Kristu. Okathi Muluku aaveleelihenry'awe arumeyi Awe mulaponi mothene, awo khulaleerya osantu (Anawetta a Osantu, aNasareeno,



aPentekosite), “Mutthikele wa Muluku! Mutthikele wa Muluku!”

<sup>76</sup> Ni ikereja sa khalayi sookhalihwa oratteene saamutheya paahi ni onyemula. Anci-ene w'alipa-oowaamini awo a vano, awo yaahipwapwela itthu sothene atthu ale yiiraly'aya ni khwira “Yaari ya xetwani.” Eyo yiirale exeeni? Nto ekereja eroopacerya wiiwa yeeyo, anci-ene aya khupacerya wiiwa. Naanaanoru, “Vakhala wira muthiyana muKatolika aaniwerya owara mithinto iya sa itthu, ni muPrustante aaniwerya. Vakhala wira ekereja Katolika yaaniwerya wira *ela*, ni Prustante yaaniwerya. Vano vakhala wira Metotista yaaniwerya, ankhi Patista? Vano vakhala wira aPatista yaaniwerya, ankhi aPentekosite?”

<sup>77</sup> Moone, eyo ti iyeettiheryo soopakiwa ni mutthu sinoorohayani-mo. Aleluya! Eyo ekeekhahi. Mwaha wa yeeyo miyo kinvirikanyaaka eyo, okhala wira Masu a Muluku annvirikanya yeeyo. Iyeettiheryo soopakiwa ni mutthu: Muluku t'ovirikanya eyo, Masu Awe t'ovirikanya, maprofeta Awe anookhala oovirikanya yeeyo, Arumeyi Awe eekeekhai anookhala oovirikanya eyo, sothene siyariwe ni Erooho ya Muluku sinookhala soovirikanya yeeyo.

<sup>78</sup> Nkawehani moota Isarayeli aakhanlyawe, moota yalenleiyi aya ni eyaavula, mpakha vookiserya Yesapeli orwa. Nkawehani moota Amerika okhanlyawe, khuttelema ni khulenleya ni eyaavula ya molumwenkuni, mpakha vookiserya Yesapeli okhala ehice. Ti yeeyo. Vano, Yesapeli vekeekhai khaakhanle veehiceni va wEjitu . . . ahiiso, ehice ya Isarayeli, masi owo aari muru muulupale ottuli w'ehice. Nto etthokiheryo ya oruma y'Ekatolika khekhanle veehiceni va Estadu Unidu, masi eyo ti eyeettiheryo ottuli waya okhala wira ethelanne ni yeeyo. Ni Bibilia ohimnye wira, elapo *ela*, awo yaamukhaliha “elatarato *goolikana* ni nxeni.”

<sup>79</sup> Oh, munna mulopwana, muthiyana, exeeni eniiraneya? Ahe, miyo—miyo koosuwela exeeni iyo. Bibilia ohimnye wira awo yaamphiya okathi ola wa Lawotiseya, ni ti vaavo hiyo vary'ahu. Nyuwo pooti okinyokha vano, masi nihiku nlo khamunrowa mwasuwelaru Ekeekhai. Nyuwo khino munoovaanyihla ni ovenya n'unyakela mpaani, eyo enooniherya paahi ohisoma wanyu. Masi nihiku nlo munoosuwela, nihiku nlo munoophavela ni munoosuwela wira Ekeekhai! Miyo kinlavula mwa Nsina n'Apwiya! Kiniihela ntoko exeko, yeeyo vookiserya enrowa okiroiha mmahiye. Kinrowa okhala namoona mpakha okhwa, Muluku akikhaliherya vale. Ti yeeyo.

<sup>80</sup> Hiyo nri va mwa mukhalelo ola hiyo oryahu olelo, sothene iyo sireyaka siiso. wIsarayeli, moota Akhahi iiraly'awe, mwaatteepea a Yesapeli mwaha wo wira owo a- . . . owo aamuthenle yoowo. Amerika, muhooleli ahu, moota xeeni e . . . Moosuwela wira muhooleli ahu aari mutthu thaaciri? Akavi anuwela yeeyo?

Namilyawu. Ookhala aakihimenrye, murevistani wala raatiyu wala televisawu wala etthu siiso, Jack Benny wala mutthu opanke e. . . Ernie Ford, kookupali wira aari yoowo. Ookhala iirale, “Atithi awe yaamukhalihenrye okhalana istaatu piili awo yahaarinaaya.” Ohalela okhalana yothene ele ehanle. Owo aaphwanye sayi? Musurukhu owo waarwiiye sayi? Mwaha wa marotta a wiskhi, ni likoore. Mwaha wa yeeyo owo aamalinhe awe mipoosito sa wiskhi n’itthu. Ti yeeyo yaamukhalinhe mulopwana thaaciri. Etthu ene yeeyo ethakhalinhe elapo ahu, etthu ene yeeyo ehononnne miyuupuwelo s’atthu ahu, etthu yaakhalinhe amiravo ahu anamuhapaliwa, ni axiruusi ahu okhala anamittompe, musurukhu wa yeeyo woomukhalaha owo mutthu thaaciri.

<sup>81</sup> Etthu emosaru, eyeettiheryo yeele ya khalayi ya Yesapeli, etthu emosaru yaalupantthe atthu ahu, etthu yeeyo yaakuminhe yaapurulaka (muRomanisimuni) khwaapaha ni waathikilasa ni owiiriha sothene, ephome emosaru y’anamakhwela waamini (Bibilia onihimya wira) eri mwa yoowo! Awo ari vo, oothelana. Nto hiyo atthu a wAmerika ninoothikela ooveveleya nirowaka, “Oh, ahe, ninnaakhela itoolare sikina vakhani ni ninviraha okathi wooreera. Niri vooreera saana ovikana ilapo sothene sikina.” Masi, munna, mulipelele minuutu mmosa paahi.

<sup>82</sup> Nrowe nikuxe eleteera ni eleteera vano, minuutu vakhani sinttharelana, noone etthu yiiraneiyee.

<sup>83</sup> Alaleyi yaarimwiiraana, yaarimwiihela mukhokweni ni yaawo, yaaroorowa ni yaawo, eyeettiheryo yothene. Eyeettiheryo yothene ya Isarayeli yaaroorowa ni Yesapeli. Awo yaahikhalana mukhalelo, ayo. Ni Bibilia khonnihimeerya wira mahiku ala ookiserya hiyo ninoorowa okhalana “wooneya ntoko oothunku”? Oprofeta wothene woomaliheriwa, munna, hiyo niri wookiseryani! Vanihimmwa elapo, hiyo niri woomalelani! Muroohoni, hiyo niri woomalelani! Khula eyettiheryo eri woomalelani waya! Etthu enttharelana orwa w’Apwiya ni okuxiwa wa Ekereja.

<sup>84</sup> Muluku ooveleliha khula ethoonyeryo, mutikiniho, ohiira sothene Owo aakhanlyawe wiiraka, ophavelaka waakuxa murima atthu, nave voohihiyererya awo aroothikela yikelihaka mwemmo. Nkawehani epooma ela nno. Nkawehani elapo ela nno, n’atthu imiya miloko sene ni imiya sene aPentekosite; ni mwaha wo weemererya Ekeekhai, awo ari vayi oxekuw’ola? Okhala wira ookhala aahimeenrye wira ahikhaliherye muthukumano. Nyuwo namuhaawi, vootthuna. . . Muluku oomoreleni ikharari, t’itthu emosa paahi kikhanly’aka ohimyaka. Nyuwo aKristu muhirina-tho muthana, murina nikhuva na ekuuku ohiya muthana. Khweeli! Etthu entthunahu ti “olaleya Ehapari yooreera ni maino,” enrowa othikilasa etthu kapatti-kapatti. Aroorowa ntoko akina aya, vano

nyuwo munooxanka xeeni hiyo okhuwelelaka. Vano, moone, “munoothanyiwa.” Miyo kinniwehererya, kihaana wira.

<sup>85</sup> Sothene iya saahiiraneya wIsarayeli. Vookiserya, nihiku nimosa, aahirwa anyakelaka vathi okhuma mothakoni, khurwa mmiravo mmosa ooneya okhala a manri, Eliya muTixibi. Owo khaakhumme mwa hata mmosa wa mitthenkeso, owo aakhumme mothakoni! Owo khaarina naata ni seiyo. Owo aari profeta a Apwiya. Munna, owo aatikinya omwene ole wa Yesapeli mwaha wa itthu sothene saari mmwe. Awo yaanimunyokha. Owo khaarina hata mukhaliheryo, miyo kinimoolipiheryani yeeyo. Bibilia onihimya wira nnari. Vekeekhai. Aahiwiiriha maYesapeli ale oowiipintari wiitho “onyema,” kinnuupuwela. Owo aahihela epaso vamutathaarini wa mwiri ntoko Yohani, simorele khula nipuro saatthunaya, masi owo aahihela eyo vale. Owo aahittikinya elapo, ooniheryaka wira awo yaahivonya, ni ophavelaka owiithanela-tho wa Muluku mukumi, ni otthikela Masu Awe ohiya okokhorela wa Yesapeli.

<sup>86</sup> Awo yiirale exeenii? Awo yaahimwaakhela? Awo yaahimunyokha! Masi Masu awe yaahikhuma nnakhala vo, okhala wira owo aarina SIISO ANIHIMYA T'APWIYA! Muluku aahivara muteko ni yoowo, ni khooniherya wira aari profeta oottikittheliwa okhala wira itthu owo aahimaly'awe sahiiraneya. Ni sothene owo iiralyawe aahooniherya wira aari profeta a Muluku. Masi nnakhala vo awo khayaaminni Iyo, okhala wira owo aahikhera mampa aya oorukuneya. Aahaahimeerya wira awo yaahivonya. Akhabi aari namweettasa. Ekeekhai! Ni nyuwo munnoona wira awo khiyamwaaminni, masi owo aahilaleya Eyo mwa inamuna sothene. Khaavo wa alaleyi yaairaana ni yoowo, owo iirale, “Miyo ka mmosa paahi ohanle, Pwiya. Nkaaweheeni, awo hata...mmosa, khaavo onrowa okhaliherya.” Masi owo aahikhalana muteko w'ovara ni aahivara. Owo aarina Masu a Apwiya, SIISO ANIHIMYA T'APWIYA! Ni aahipwapwela elapo, owo aahipwapwela ekereja, owo aahipwapwela sothene saakhanle, ni Muluku aari ni yoowo!

<sup>87</sup> Hiyo noolaiheriwa, mahiku ookiserya, wira owo onoookolowela elapo ela nave. Miyo koosuwela, Yesu, okathi...Matewu 17, okathi amukohaly'aya Owo, “Xeeni alipa ikano ohimiyaka wira, ‘Eliya...?’”

<sup>88</sup> Nkawehani etthu Owo aahimmy'awe, “Vekeekhai Eliya ohaana orwa toko,” ovira, opa-...okathi w'ohoolo. Masi nto Owo aahinvaha Yohani ntoko ethoonyeryo. Yohani khaari Malakhiya 4. Yohani aari Malakhiya 3, “Moone, Miyo kinoomuruma namitthaka ohoolo Waka, wira alokiherye ephiro.”

<sup>89</sup> Malakhiya 4, Owo iirale, “Nihinatthi ophiya nihiku nuulupale ni noowoopiha n'Apwiya, okathi elapo yothene

enrowaya opahiwa ntoko ikokhola; nihinatthi ophiya nihiku nlo, Miyo kinoonveleliha Eliya.”

<sup>90</sup> Ni owo khaari Yohani, okhala wira Apwiya khiyaapattinhe elapo okathi Yohani oruuly’awe. Nto nyuwo mwaweha vale, ni ekapiitulu yookiserya, eversiikulu yookiserya, Owo iirale, “Nto owo...” (nwehe: *owo* alavulaka) “...onoorukunxa mirima s’axitiithi w’ana, *ni* mirima s’ana w’axitiithi.”

<sup>91</sup> Vano nwehe! Voopacerya Yohani aahirwa, Eliya oopacerya, owo iirale exeeni? Owo aahirwa ni aahiruha Mutthaka ni khurukunxa mirima sa ortotookisa a khalayi waamini wa ekereja ya vano, anamwane. Masi okathi onrwaawe Eliya oottharelana, okathi wa woomalelani, owo onoohokoloxa ni okuxa mi—mirima s’axitiithi...mirima s’ana, kiireke, ni ohokoloxerya Waamini w’axitiithi apentekosite. Munnoona evirikanelo? Owo khonrowa okhala mmosa wa ala *aniihaniwa* hiyo nrinaahu olelo, owo onootthikela-tho Miteko 2 ni opacerye vaavo. Owo onoolaleya Ehapari yooreera yooihononiwa, onoohimya itthu imosaru Petru aahimmyawe Nihiku na Pentekosite, okhala wira ethhu owo aahimmyawe oPentekositeni yoolipiheriwa mwa Soolempwa sikina. Owo khonrowa wiitakanxa ni mutthenkeso, Eliya arwa vale. Owo onrowa waanyokhaka athiyana ntoko Eliya, ntoko wira...ahiiso athiyana ootakhala, siiso ntoko Yohani. Owo onrowa ophentaka mothakoni ntoko ale. Owo khonrowa wiinanela. Hiyo nimmulipelela owo orwa. Owo onimoorwa! Muluku ohimmye wira owo aamurwa, nto owo onookhala vaava!

<sup>92</sup> Miyo kookupali, mwa khula enamuna, Mutthaka hiyo orinaahu olelo onooholela orwa wawe wuulupale. Ayo, mulopwana! Owo ori mphironi, ooyariwa. Ntoko saaryaya ni Eliya, okhuma naanaanoru mothakoni, nipuro nlo owo onimwiisuweliha mmansawe. Owo onoolaleya Miteko 2. Owo onooruha Waamini w’axitiithi ala a khalayi aPentekosite otthikela wa...waamini w’ana ala aPentekosite, otthikela Waamini w’axitiithi aPentekosite. Owo onootthika, olukama Miteko 2, Miteko 2:38, ipantte iyo sothene. Owo onooruha Ehapari yooreera, yoomalela yooihononiwa. Owo khonrowa okhalana naata ni Yesapeli ni eyeettiheryo awe. Owo onrowa okhala murumeyi a Muluku. Vekeekhai onimwiira! Bibilia ohimmye wira owo aamoorwa. Owo onoolaleerya ni onoomana ni Mutthaka awe wiitho wa maYesapeli ala, siiso ntoko Eliya aamwiirihale—awe wopaceryani Isarayeli. Awo anoomunyokha! Awo khanrowa wiiraana ni yoowo. Nnari, nnari. Owo onimoorwa! Muluku oolaiherya, nto owo onoophiya vanlakani. Owo ono—owo onoolaleerya Ekereja Yoothanliwa ntoko Eyo sihimaly’aya wira owo aamwiira, aatathaka ale Ooathanliwa, aatathaka itthu sa mw’erutthuni, o—olumwenku ni itthu, atathaka yeeyo, akaphulihaka, athukumanyka Ekereja, atthu.

<sup>93</sup> Miyo koosuwela wira nyuwo muniira, “Owo muromolelo

aka.” Munna, moovonya! Yohani aarwiiye ni eyeettiheryo ya mulopwana mmosa wira amooniherye Mulopwana mmosa: Yesu Kristu. Ni Eliya khonrowa okhala eyeettiheryo, onrowa okhala mulopwana mmosa, Yesu ohimnye siiso. Onrowa okhala mutthu oottikittheliwa ni Erooho Yoowaarya. Ni owo khonrowa wooniherya hata mwiri wa amuluku araru wala axexe, owo onimooniherya Mmosa: Pwiya Yesu Kristu, okhala wira Mutthaka awe onrowa waattikinya aana aPentekosite othhikela-tho Waamini w’axitiithi.

<sup>94</sup> Muupuwele, munna, kaahimyaka itthu iya wira kikhale oolipa murima, onnikitthuna okhala waltaari. Miyo kinimooleelani, “SIISO ANIHIMYA T’APWIYA!” Vakhala wira Muluku kholipihenrye wira koohimenryeni Ekeekhai, mulaponi mothene, mulaponi mothene, vano mukileele vatthu vaari ovonya. Miyo kinooleelani Ekeekhai! Mutthikele wa Muluku, voowaakuva! Muhiye iyeettiheryo iya, okhala wira Bibilia oohimya Muliivuruni mwa Wisuupulula, wira etthokiheryo ya Katolika y’oRooma yaari “namuttompe,” ni owo aari “mai a anamararuwa.” Exeeni iyo? Ikereja, iyeettiheryo.

<sup>95</sup> Nto ekereja Metotista, ekereja Luteraano, sikhumme vayi? Metotista, Patista, mitthenkeso sothene sikhumme vayi? Muluku khonatoko othhokiha ekereja. Ekereja Katolika ehimnye wira awo apacenrye ottuli wu, “Yesu t’otthokinhe ekereja.” Kintthuna—kintthuna nikukhu mwa wahala, wala nikukhu mBibiliani. Khonakhaleke mutthenkeso mwa iyaakha imiya tthaaru ni thanu na mosa nuumala okhwa wa murummwa ookiserya, nuumala awo aropaka Muthukumano w’oNicea ni khupaka mutthenkeso. Nto okathi Lutero okhummy’awe... owo aari mutthu muulupale a Muluku, masi amalaka-ru okhuma, nikhuru nle naamukhaani n’atthu khuruwa iwe khupaka mutthenkeso mukina. Vano Erooho Yoowaarya khimurweela John Wesley, owo khanatthokiheke etthu, masi varonwaawe nto awo khutthokiha. Vano Erooho Yoowaarya khurwa n’aPentekosite, vano awo khukhuma wa aMetotista. Nto exeeni yiiraneieye? Vano *awo* arimwiiitthokiha.

<sup>96</sup> Masi enookhala eyeettiheryo ya mutthu mmosa enrowa orwa n’uwerya ni muttikitthelo w’Eliya, wira emaliherye y’eprofeta. Aleluya! Owo onoottikinya. Ni, muupuwele, owo aahaalaleerya, khulaleerya, ni khwaahimeerya itthu sothene, vano Muluku aahivara muteko ni yoowo. Masi Mutthaka awe wookiserya waari opwapwela Empa Yootteela. Uh-huh. Okathi Yohani orwiyaawe, Mutthaka awe wookiserya waari opwapwela Empa Yootteela ya nihiku nle. Mutthaka wookiserya w’Eliya, okathi owo aarwaawe mphironi voosis’ule vaamanly’awe okhala Ohoolo wa Muluku iwe, khweetta arowaka ephiro ele ni maihi mwa yoowo othene, muru awe wa ntari waaryaka, ireru siveveleyaka ni ettheke, maitho ale, makhaani, oowuuluvala yaamwaarya ni ovuwa wa Muluku. Ekopo ele mmatatani

mwawe, ni inawu sawe soolipa saana ntoko saaweryaneyaya. Owo oniira exeeni? Eettaka akhumaka oSamariya arowaka ohoolo wa Empa Yootteela, ni airaka, “SIISO ANIHIMYA T’APWIYA!” Ahoovaka etthu. Ikereja saahimukhootta, atthu yaahimukhootta, tivo owo ompaka opwapwela wawe wookiserya, Empa Yootteela.

<sup>97</sup> Vano exeeni yaakhumelenle nuumala yeeyo? Nwiriyan! Nuumala opwapwela iwo, nsu nawe naahikhala noomaala, khaavo aamwiiwale-tho. Muluku aroomukumiha vanlakani, khwira, “Eliya, nyuwo moomusuweliha Mutthaka anyu wothene Isarayeli, awo annisuwela Owo. Vano nwele nno mothakoni, mwiirakamelihe, mwiivalaanye okhala wira kinrowa wira etthu. Kinrowa owooniha awo ele ekhanle okhootta Mutthaka Aka.” Exeeni jaarwiiye? Ekhotto, etala, okhwa mwaha wa etala.

<sup>98</sup> SIISO ENIHIMYA EROOHO YOOWAARYA, “Nkawehani etthu enrwa! Nwehe etthu enrowa otharelana! Yaahikhala etala, *enookhala* etala!” Oh, khino kahi ya yoolya, masi yo wiiwa Masu a Muluku ni Ekeekhai Awe. Ikereja sothene sinoorowa wiiraana ni sinookela mwa yeeyo, siiso ntoko sikhanyaya soomiriwa ni yeeyo.

<sup>99</sup> Eliya iirale exeeni? Owo aphywannye muro wowiipithiwiwa, vasulu vamwaako weiwo aaphwannye awe Maasi a Ekumi, Wiisuupulula w’eMuluku wa Muluku owo oryeene vale vathi va owerya wa Muluku. Wiisuupulula waari muro mukhaani wo wiipithiwiwa, okathi akina aya yaavoliwaya etala. Ni Muluku aareerihe arumeyi Awe (anakhuku awo), awo yaanimuruuhela etthu yoolya owo ary’ene ottaiwene w’atthu. Ni awo yaari vathi vale evoliwaka etala mwaha wa muhakalaliho ni sothene siiraneyaka. [Nipuro vahiitthu mufiitani—Mol.] “Muhiiwe-tho mihakalaliho sawe o...Ori vayi noowali ole mutokweene oneetta apwapwelaka mitthenkeso sahu? Ori vayi yoowo vano?” Awo khiyaasuwela. Owo aaronwe okhala ni Muluku, nipuro nimosa noomeekha awo yahiiwaya nsu nawe. Vano awo khupacerya wona.

<sup>100</sup> Muluku aveleeliha Mutthaka ni waaleela atthu, nave awo khuhinaakhela Yoowo, nto Owo onoomukumiha murumeyi Awe ni oveleeliha ihasara Sawe: etala, okhwa (naalavulaka mwa erooho, mw’erutthu nave). Nwehererye ovolola, munna. Munuupuwela wira muhona etthu, mulipelele okathi vakhani paahi. Khimunatthi wona etthu. Nyuwo munuupuwela wira munikhwela muhakalaliho wa muroohoni, mulipelele mpakha okathi vakhani. Mulipelele paahi, munootthuna ni munimunlela wiiwa Masu a Muluku. Biblia ohimnye siiso! “Enookhala etala mahiku ookiserya,” ohimnye ti profeta, “ni kahi ya yoolya ni maasi paahi, masi yo wiiwa Masu a Muluku eekeekhai.” Masi nsu nle ninrowa okhala noomaala, mothakoni nipuro nlo, noowiipitha.

101 Owo aarumme anakhuku, arumeyi Awe. Attotopeliwe axipalame ale, Arumeyi Awe, yaakhalinhe nsu na—na Eliya nikumi okathi wa yawawe—wo ohuluwa wawe ekereja. Anakhuku yaanimuruheela enama ni mukatthe voosiisu, ni enama ni mukatthe makaaripi, ni owo aawurya v'ephattuweloni ekhaani okathi akina aya ohitto iwe yahaarinaya yoolya ya erooho ni maasi.

102 Vano nihiku nimosi, jaarwiiyaya sookhumela mwaha wa etampi, ni Muluku waakokhorihha atthu Awe... Yesapeli aahikuxa sothene, owo aahikhala ni sothene, ni owo onimwiira-tho! Eyo ti SIISO ONIHIMYA BIBILIA OOWAARYA A MULUKU, "Owo onimwiira-tho." Owo ori veehiceni naanaano va, ottuli wa mwaatteepea; eettihaka khula enamuna ontthunaawe, khaavo onrowa omweemexa. Vekeekhai, khaavo onrowa omweemexa vano, okhala wira ele awo ahiwenryaya ophwanya mmakhuruni mwaya a etiini yaathikinle—yaathikinle yothene ni ipoliitika, nto vale awo yaahiira. Uh-huh, vekeekhai ti yeeyo awo yiiraly'aya. Yeeyo, epoliitika enrowaaya okhala ekhottiheryo entthikela mpakha ekanyeryo ya nxeni, vekeekhaixa ntoko seemenly'aka va, moone, ntoko Bibilia sihimaly'awe.

103 Koosuwela wira ninoopisa, kinimwaakuva. Kihaana ophiyerya nuulumo nla nookiserya, Apwiya yakitthuniherya.

104 Nwehe! Eliya aahikhala vasulu vale mpakha Muluku omweettiha. Owo khaarina mihakalaliho. Owo khaalaleiye avirikanyaka etthu. Owo aarookhala paahi vasulu vale ni Muluku, mothakoni, okhala wira owo aari mutthu a mothakoni. Owo aaleliwe mothakoni. Ni Yohani aaleliwe mothakoni.

105 Owo aaronwe mothakoni meekhaawe ni Muluku, aahikumihwa mukereja numala ovaha Mutthaka awe. Ni ekereja khukhoota Yoowo, khukhoota Yoowo. Nto vookiserya mitthenkeso khasiirale etthu, tivo owo aahaana orowa tu. Muluku khumukumihha vanlakani, khimuroiha mothakoni, khwira, "Murwe nno, awo khanrowa-tho wiiwa. Murwe, nto kinrowa waarihelela ehukhumu Aka." Oh, ayo, owo onookhala vaava nihiku nlo, nwehe.

106 Vano, nuuvira mahiku a oprofeta awe, exeeni yaakhumelenle? Ekereja yaahivolola, woopopiha wuulupale wa Yesapeli, owo aahaakuxa othene aya, khwaamiry a othene aya. Owo aahaakuxa, ni khupaka ilatarato ni sothene sikina.

107 Masi, nihiku nimosi, Muluku aahimwiihana-tho wira akhume! Owo khikhuma. Nwiriyanne oratteene vano, ni muhikinanareele. Miyo kinihimya wira, "SIISO ANIHIMYA T'APWIYA!" Okathi owo okhumaly'awe, Muluku iirale exeeni? Owo aamurumme wa muthiyana naamukhweli. Owo emaara emosa aarina o—owerya wa mulopwana vamuru wawe, masi waatthuneieye okhwa wira omutaphule wira awerye waamini

Masu a profeta. Mooweha yeeyo? Owo aarina iya aamweetiherya enamuna ela ni enamuna ele, mwa emosa wa ixikola ohitto iwe. Masi okathi wa eyuumu yuulupale, owo aahimiriwa, okhwa waahimukuxa. Owo khaari ootthukiwa-tho ni mutthenkeso, tivo owo aahilikana vano wira aiwe Masu a Apwiya. Muthiyana, ethoonyeryo ya Ekereja; naamukhweli, iy'awe (mutthenkeso) aakhwiye, nto owo paahi aaitthokelela okhala mukumi. Nto Muluku khwira, "Murowe wa yoowo vano, owo onoowiiwani, miyo koomuruma."

<sup>108</sup> Oh, hiyo ninnuupuwela imaara sikina, nyuwo nikhuru naamukhaani vo mukhanle ooromeleyaxa ni muniira ithu sothene munweryanyu wira mukhalane muthukumano, mphavelaka owooniha atthu wira murim'anyu ori saana ni munthuna wira awo yiilokiherye, munuupuwela wira munvira okathi woorika. Masi, muupuwele, Muluku onniwoonani! Munnimpheenta Yoowo, koosuwela wira munnimpheenta Yoowo, khimwaarowa okilaathi va, khimwaarowa okhalela-tho etthu ene eyo. Muluku onniwoonani. Ayo!

<sup>109</sup> Nto vairaly'awe siiso, aiy'awe vakhwiyaaya, mutthenkeso awe khukhwa, tivo vano owo oolikana wira aiwe Masu a profeta. Vano profeta vaphiyalyawe vamukhora khunvekela ma—maasi vakhani, owo aahirowa wira aruuhe. Vano owo khwira, "Mukiruuhele othu vakhani."

<sup>110</sup> Vano owo khurukunuwa khwira, "Apwiya ankhanle akumi, miyo nkirina hat'etthu woohikhala woophiyerya paahi."

<sup>111</sup> Vano, yaakhala ntoko wira owo aarummwe wira akuxe vakhani owo aarinaawe, masi yaari voovirikana. Owo aatthuna ovaha ele aarinaawe wira akhaliherya Masu, Muluku khimulyiha. Ni nyuwo mwalikanana ovahererya Erooho murinaanyu, Erooho Muluku oovanhaweni wira mukhaliherye Masu, vano Muluku onimookhalihani mukumi. Aleluya! Oh, avuwihwe Muluku! Munnoona yeeyo, ekereja? Muhuupuwele wira kiroovahuwa, nnari. Masi ele murinaanyu, ele ekhaani munimwaamininaanyu Muluku, waamini orin'anyu, muhele mwa Masu, kahi mmutthenkesoni! Muhele Mmasuni a Muluku, Owo onimookhalihani mukumi.

<sup>112</sup> Owo aahilikana nto, okhala wira khalayi khaawerya, okhala wira awo khayaamutthuniherya. Masi vano owo oolikana. Owo onimwaakhela? Muluku aamurumme profeta mphironi mwawe. Owo onimwaakhela Masu awe? Owo onoomwaakhela profeta ola? Ayo, owo aahimwaakhela. Nto owo khimuhimeerya, khwira, "Vano, ekumi vakhani murinaanyu, muhele mu, mukiruuhele miyo toko." Nto exeeni yiiraneiyeyo? Okathi olumwenku mukina waavololaaya ni okhwa mwaha wa etala, owo ni an'awe ni ethoko awe othene yaalya vaara vararu khula nihiku, Muupululo w'eMuluku wa Masu. Kinroromela wira munnoona yeeyo, apatthani.



113 Exeeni yiiraneieye? Owo aahikhala iwe mpakha etala omala, akhalaka ni muthiyan'ola (Ekerej'ela) yaamwaakhenle ni yaaminni Masu awe. Vano owo aahimukhaliha mukumi (aahikhaliha Ekereja ekumi) ni Masu a Apwiya, okhala wira owo irale "SIISO ANIHIMYA T'APWIYA."

114 Vano, khanirina okathi wira nimutharihe wahala othene, moosuwela, moota owo aarin'awe okumana ni Pahali. Owo onimwiira, nimosa wa mahiku awo, muhixanke. Okathi onrowaawe orwa anyakelaka akhumaka mothakoni, nwehe eniiraneya.

115 Exeeni yiiraneieye? Vano Eliya ooreera murima, mutokweene, profeta, murumeyi eekeekhai a Muluku, ophiyalawe wookiseryani w'ephiro awe, Muluku aahimuhimeerya, nihiku nimosa, khwira, "Eliya, nyuwo moolaleya okathi munci-ene vano. Moowanana Yesapeli ni wiipintari wawe wothene ni sothene mpakha moophweeleya." Khwira, "Murwe oYordani!" Nto va owo onoorowa, khuphiya oYordani. Iwe waavira muro wa khalayi wa marove, maasi, ooriirya ni oowuuma, ntoko khula mutthu sirinaawe woonanana: Yordani, okhwa.

116 Masi okathi murumeyi ula muulupale a Muluku okhuruwenlyawe oYordani, ni mwan'awe eettaka ni yoowo, mwaana a Ehapari yooreera, . . . Oh, ayo, owo aari mwan'awe, "Atithi aka, atithi aka, ikaaro sa wIsarayeli, na anakhavalo aya." Okathi owo ni mwan'awe yaattanse aya vamosa, mpakha oYordani, owo aanaaweha atithi awe okhuma voosiis'ule.

117 Vaphiyalyawe oYordani, owo aahookola moonoo khukuxa nlaya nlo na owerya mmakhatani mwawe, khwira, "Okhwa, khamunwerya okiiriha etthu." Ni khummana Yordani, "Mutthukuwe, kinrowa olapuwela epante ekina voosiis'ula." Exeeni yiiraneieye? Owo waahitthika ni khuuma ntoko oruttutthu. Exeeni iiraawe profeta mutokweene? Owo aaweha epante ekina ya Yordani, owo aanisuwela wira yaahikhala ekaaro yaamulipelela iwe ni ikhavalo. Owo aarowa owaani, muteko awe waahimala. Mwan'awe mwa Ehapari yooreera aamukuxa opuro awe.

118 Miyo kaarwa owaani nihiku nlo kikhumaka Onikela nsuwa. Ela enikirweela mmuupuweloni. Miyo khimutthukula raatiyu (kaahaana weethiha mahiku mararu, ikilomo ikonto tthaaru ni imiya thanu na tthaaru ni miloko mithanu na mosi ni piili, meekhaaka). Miyo kimutthukula raatiyu ni ki . . . kiiwaka sa muroohoni sa Del Rio, Texas. Aahikhala mulopwana mmosa aalavula sa mulopwana mmosa mutokweene, ooweela, mulipa-ooripa. Owo aahalela okhwa nto aahaana okhuruwela omuratthini, owo khwira, "Icampali sa eweero kinrowaaka owara, wira keette iphiro sa eweero." Nooriipe ola mutokweene aahilaleya ekumi awe yothene ni etthu emosa paahi owo aakhanly'awe wuupuwelaka waari okurunuxiwa murima, owo

aarin'awe, aari pankwe awe a khalayi aathomeiwe vaxirini. Owo aakilaathiki vasulu va miritti sa nxotte ni orumiha masipo, amumulaka orumeyi awe, ni pankwe a khalayi. Ti enamuna owo aarinawe, yo wiitthyuuwa. Owo khwira wira ekhavalalo ya khalayi ya mwiila woothikiliwa owo eettihakaawe yaarowa okhala weiwe ni ekaaro. Miyo kuupuwela seiyo. Owo khwira, "Icampali iye sa eweero kinrowaaka owara, wira keette iphiro sa weero."

<sup>119</sup> Nto vamanlyawe wiipa, miyo kimuttipiha raatiyu. Ni kaarowa iwe, kilipihaka evulante. "Oh, ti yeeyo. Ni miyo kihaana ophiya weiwo, nave. Exeeni kweekwe enkikurunuxaka murima? Kimphwanya vayi okurunuxiwa waka murima mothakoni?" Kihaana erifle, ekhaani ya khalayi eniitthaniwa. . . Kinxaya ni yeeyo okathi w'ephovo wa mwaakha. Ti Remington .270, muthinto 721. Mulopwana mmosa, munna, oookivaha, oCalifornia, miyaakha sivinre. Miyo kinnixayaka ni yeeyo miyaakha ni miyaakha. Moota. . . okurunuxiwa murima xeeni onkhalakaaya, okhala wira ko—koosuwela wira owo kapwitthi onopa saana, ni waari okurunuxiwa waka murima mothakoni.

<sup>120</sup> Nto miyo kaahuupuwela yoowoona aka. Okathi ophiyalaka iwe khuwoona athu aka othene, kaahiwa etthu wunla vathi-vathi, nto va aarwa Prince aka mwaamukhaani (ekhavalalo aka ekhaani yo weettiha) khuhela muru aya vanikhatani vaka. Miyo khuupuwela, "Ayo, omosa wa voosiisu ula ni miyo kinoophiya, oYordani." Nto .270 ya khalayi kaavarelakaaka. . . emphwanyaneya vaxirini. Nkinathomole okathi munci-ene okhuma ephovo yookiserya. "Ekhavalalo ele ekhaani keettihakaaka, Muluku onoorowa otthukela vakaaroni vaka, voosiis'uwo kaphiyaru omurathini." Enrowa okhala iwe epantte ekina ya muro. Muluku onooruma, miyo kaahoono eyo ohiyu uwo. Eyo enrowa otthukeleliwa vakaaroni vaka, voosiisu uwo. Kinoorowa, kiwelaka mmeekuni.

Nivekele.

<sup>121</sup> Oh, owerya iwo wa Muluku onrowaaka opuha okathi onrowaaka weetta iphiro iye sa eweero! Ayo, erifle ya khalayi ethomeiwe vaxirini vano, khenrowa okhalana muteko nto. Kinniikoha, vakhala wira ekaaro aka ennoorwa, vakhala wira ekhavalalo aka yaamukhaani yo weettiha koonale aka mwa yoowoona enoottukeleliwa vakaaroni vaka, voosiis'uwo, yeemenle omurathini. Kinroromela wira enookhala. Kintthuna kikuxiwe. Kintthuna wira Ekereja ewele siiso nave, kimmuthuna khula mmosa a nyuwo.

<sup>122</sup> Mwaamutthuna osuwela okathi onrowaanyu ophiya oYordani? Munoohiya iyeettiheryo iya sootakhala sa olumwenku ola mmwaakhele Yesu Kristu ntoko Moopili anyu? Mwaahikhale muKristu, munoovenxa matata mwiire, "Mukivekelele, Munna Branham. Wira kaphiya oYordani, . . ."? Muluku ooreeriheni.

Muluku ooreeriheni. “Kaphiya oYordani, kintthuna kaakhele owerya wa Eroho Yoowaarya mwa miyo kimane maasi awo ooriiry, kilapuwele epannte ekina.”

<sup>123</sup> Munwerya sayi okilaathi ni epwapwelo eyo siiso, muttikithelo wa Eroho Yoowaarya, ni musuwelaka wira Eroho Yoowaarya ennikilela mukhalelo anyu, nave khuhinavenxa ntata? Eyo enooniherya wira okathi wa mukwaha wa mothakoni! Aamukhala mmosa nihinatthi ovekela, mukina? Aakhala aili avenxale matata; araru, Muluku ooreeriheni, mwan’aka.

<sup>124</sup> Tith’ihu a Wirimu! Araru; eyo enookhala yooreeraxa, Pwiya, awo—awo yakhalaru weiwe nihiku nenlo. Miyo kinvekela wira awo akhale, Pwiya. Awo aavenxa matata okhala wira awo aakupali wira iyeettiheryo iya sa molumwenkuni sinookhwa, ni masu a Masu a Muluku anookhala etthu yoolipa ophwanya, Muluku onookumiha mukereja. Okhuwela, wiitthana wa Mutheli onookhuma vahilekenle nto eyeettiheryo ya Yesapeli enoomalamaliha. Masi awo antthuna ekhalane...ekhaleke ni ephattuwelo ele yowiipithihiwa ntoko Eliya saaryawe wira elyihaweke okathi wa etala. Muluku, mwaavahe Eroho Yoowaarya naanaano va, musarihe mirima saya ni ohakalala ni murettele, ni mukhalihe miyuupuwelo saya mwa Masu a Muluku wira ekhaleke naanaano va ni ohoolo, mahiku othene. Mwaareerihe, Tithi. Awo t’Awinyu, mwa Yesu Kristu Pwiya’ahu.

Ni miru sahu sowuurama:

<sup>125</sup> Ale avenxale matata ni antthuna omukupali Kristu, mwaamuwerya weemela, okathi vakhani paahi, noovekelelakani voomeekha? Nvenye paahi mweemele.

<sup>126</sup> O Muluku, koovonya? Hata araru avenxale matata, oohikhanyereriwa ovenya khweemela wira akupali etthu ene yeeyo awo yiiraly’aya. Pwiya Yesu, miyo kinnivahererya sothene mmatatani mw’Anyu. Miyo koolaleya Masu Anyu, ni nkihiyerenrye mwa hata nimosi. Vano miyo—miyo kinaahiyerya empa yaawo, Tithi. Mwiire ele entthuneya ni ekereja ni murumeyi Anyu, sothene siri mmatatani mw’Anyu.

<sup>127</sup> Tithi, kinvekela wira Nyuwo nwoopole ale arimeenle, mwaasarihe itthu sooreera ale avoliwe etala ya mmurimani, mwaavahe Ekumi Ehinimala ale anvoliwa ntthona, mwaavenxe arumeyi Anyu wira elaleerye Mutthaka, mwaavahe openuwa aretta n’ale ooxanka, mphwanye ovuwa Yeenyu, maana miyo kiniivahererya vamosa ni Masu Anyu. Ni mmatatani mwaka, ni mmurimani mwaka, ni mmuupuweloni mwaka, mulepe Ikano Sanyu, mwa Yesu Kristu Pwiya’ahu. Amen.

Kaphiyaru omuratthini woomalelani wa nihiku,

Nkintthuna wiipa nenlo.

Ni enakhala ntoko apatthani aka aroorowasa  
othene;  
Onookhala Mutthu alipelelaka yoowo onrowa  
okooniha ephiro,  
Nkinrowa okhala oomulapuwa Yordani  
meekhaaka.

<sup>128</sup> Mookawa ittikitti sa mavekelo, Bill? Kinnoona othunku. Olelo nvanhe exeeni? B? Moovaha A nave, kahi siiso? Vaareera, kiniihana B toko, mmosa o . . . Ettikitti ya mavekelo B, nummero noopacerya. Ninrowa ovekela mwaha wa eretta anyu. B, nummero noopacerya, taani orina? Ettikitti ya mavekelo B, nummero noopacerya, mutthu mmosa ottuli iwo. Murwe nno, muhano. B, nummero naneeli, nvenxe ntata. Muhan'owo? Nummeru naneeraru. B, nummeru na neexexe, mwaamutthuna ovenxa ntata xontte, wira koone ti yayi. Naneeraru? Nummeru naneexexe, B, nummero naneexexe. B, nummero naneethanu. Munooverya ovenxa ntata xontte? B, nummero naneethanu. Mulopwan'ole? Vaareera, thanu na mosa, thanu na piili, thanu na tthaaru, thanu na xexe, muloko, muloko ni emosa, muloko ni piili, muloko ni tthaaru, muloko ni xexe, muloko ni thanu. Ahe, va, othene arina B avenye, khula enamuna. Paahi . . .

Wira . . . [Nipuro vahiitthu mufiitani—Mol.] . . . yoorowa molumwenkuni mothene, khula misiyonaariyu vapuwani, khula nipuro awo anweryaaya.

<sup>129</sup> Ittikitti sa mavekelo sothene B avenye mukuxe opuro anyu voolikana ni mammero anyu.

Vano, ti sivi saattharelana? A? T'ani orina ettikitti ya mavekelo A, yoopacerya? A, yoopacerya, eri yayi? Vekeekhai eri muumu. A, yoopacerya? Aavira mahiku maili avahalyaya, ahiiso mararu vano, khino siiso ahikhanle vaava. Othene arina ettikitti ya mavekelo A, vano nyuwo muthataane nno. Mukhale muttharaka exiri, voottittimiha.

<sup>130</sup> Kintthuna olavula ni nyuwo muhirina ittikitti sa mavekelo, minuutu mmosa paahi eliinya ehinatthi opacerya.

<sup>131</sup> Vano, ni ettikitti anyu ya mavekelo, nvarele mmatatani mwanu wira amiravo ewerye waakhela ettikitti anyu ya mavekelo. Mookhala mulipelelaka, murwiye voohipisa ohiyu wira mwaakhele ettikitti anyu ya mavekelo, ni muhaana ehakhi yookela muliinyani. Miyo kaahoolaiheryani, woovekelelani. Vano kinoophavela ommaliherya natiri aka, Muluku akikhaliherya.

<sup>132</sup> Owo ti mwammiravo anyu? Mmiravo ooreera murima saana. Xontte kileveleliwe. Muthiyan'ola va ti ethoonyeryo yoooreera ya mutthu a wAmerika eekeekhai. Mwan'awe mulopwana, makakawu ni ekhasako ya malepa. Mwaaruusi orina maihi oorakama, owanre vooreera. Muluku amureerihe ni ethoko awe, n'aiy'awe, oophentiwa awe. Owo vekeekhai ti E.U.A. yooloka, ni

“oKristu” yoolempwa vasulu vaya. Elapo ahu ekhale siiso okathi munci-ene! Mukilevelele, mwaamuthiyana, mwaha w’ohimya yeeyo, masi miyo paahi. . .wira atthu awerye woona moota kinuupuwelaaka wira muKristu ohaana okhala; oohikhalana manikuure, enekhaleru exeeni, muhano paahi.

133 Muluku ooreeriheni, Munna Sullivan.

134 *Meetiku Muulupale*, xontte.

Meetiku Muulupale vano ori vakhiviru,  
Yesu oomoriwa ikharari;

135 Munnimwaamini Yoowo? Munnaamini wira Owo ti Meetiku Muulupale? Vano mukhale oottittimiha okathi vakhani paahi. Nookhalana okathi vakhani nlelo, miyo kiroothikila mutthaka vakhani paahi. Kinroromela wira moosuwela, nnya, etthu ehimnye aka. Mwaamini paahi ni murim’anyu wothene. Othene yakhalaru oothataana, mutthu ottuli iwe wira aathataanihe atthu. Vaareera? Munihimya exeeni? Vano othene arina ittikitti sa mavekelo arimweemela.

136 Ni nyuwo ota iwo munnaamini, nave, muhirina ittikitti sa mavekelo? Mwaamini-ru paahi, Muluku onoowitthanani *nyuwo*. Vano, ittikitti sothene sa mavekelo siri muliinyani.

137 Mwaaruusi ule okilaanthe ottuli iwe, onwereiwa mwetto mmosa, vasulu va yeela. . .Munnaamini wira Muluku onoovoniha? Mwaaminiki vale, mwaamini paahi nto Muluku onimoovahani.

138 Munnaamini wira atithi anyu aretta anoopenuwa? Munnaamini, munoowerya waakhela.

139 Ankhi nyuwo vo, muninkelelela musulu anyu ni mukhalelo wo wuukhuleya? Munuupuwela wira Muluku onoonvoniha? Muhano, mukilaanthe vo, mwaaminiki vale, munimwaakhela.

140 Othene anyu munoorowa waamini?

141 Vano kintthuna. . .Akavi w’axinn’aka ari va, alaleyi a Ehapari yooreera, alaleyi a Ehapari yooreera yoomalela wala anakhaleru aani, munaamini ovoniha wa Muluku? Nvenxe matata. Kaatthuna wira murwe va ni mukikhaliherye waavekelela atthu ala, wira atthu yoone wira nkihiyo miyo paahi kinaavekelela atthu, ni nyuwo munoowerya. Murwe va mweemele vaplataforma ni miyo. Munimwiira, axinna, nyuwo arumeyi? Murwe vaava mweemele vaplataforma. Ti yooreera. Kooxukhuru, axinna. Kooxukhuru. Rwaakani ohoolo, axinna, murwe.

142 Mwinre exeeni? [Munna mmosa oniira, “Nipakeke eliinya yaneeili va?”—Mol.] Ayo, mpakeke. Mpake iliinya piili nno, enookhala yooreera. Ti yooreera. Vano murukunuwele epantte ela ekina, munna. Murukunuwele epantte ela, kinrowa waaruuha atthu va. Vano akina wa nyuwo mukhale epantte aka, nno, xontte, mweemele epantt’ila. Ti yeeyo.

143 Vano, wa muthukumano, munniwoona axilopwana ala ooreera murima va? Ala atthu anrowa weemela vasulu va, ni aneemererya Ehapari yooreera yeela emosaru kinlaleyaaaka. Munnona? Awo ahoorwa va okhala wira annaamini Yeeyo. Vano muhaana okhala oowiisunnuwa mwaha wa pastore anyu oniisooniha vapalataforma va, olaleerya, woolipa ni wa ikuru. Ala axilopwana arina muupululo, ansuwela wira. . .kahi wira kirina nthowa n'axilopwana, imaara sikina niniithukela mwa iyeettiheryo sinnikhaliha. . .Iyeettiheryo ti nikhalanne ahu nthowa ni seiyo; kahi ni mutthu, murumeyi a Muluku.

144 Vano, vaakhanle wira naahikhalana olamula sa mmurimani wa atthu othene va, okathi xeeni munuupuwelaanyu wira kaamukhala va? Kaammora n'uphiyerya ntoko. . .nuumala ntoko thanu na mosa, thanu wala thanu na mosa, muloko; vakhani sikina, khino nuusu, epantte yaneexexe ya eliinya, kaamooceya, akina aya khayaarowa ovekeleliwa. Khanikhanle wiiraka yeeyo. Ni okathi eyo. . .masi khivantthuneya nyuwo okhalana yeeyo. Nyuwo munnisuwela ole okhanle mukattiyamiho anyu. Nyuwo munnisuwela mwiiralyanyu, vano mulape itampi sanyu. Akhala mutthu a nyuwo iwo orina ohoverya hata vakhani mmurimani mwawe, mukumihe naanaano va mmuleele Muluku wira ooleveleleni. Mwaahikhale oratta-ene ni Muluku, mmuleele Muluku wira ooleveleleni. Mwaahiire, ni muhikhanle oratta-ene ni Muluku, khenrowa wooreerelani hat'etthu ovira va. Nyuwo munihonona okathi anyu paahi. Eyo ekeekhaii. Vano, eyo ekeekhaii, axinna? Ti yeeyo.

145 Nkawehani va. Va omphwanyaneya Munna Kidd va. Kaahala okhera ipenweu sa ekaaro aka kirowaka wa yoowo, woovira mwaakha wala miili, o. . .Owo aamookhwa ni kankuru, aamurowa okhwa nihiku nle. Amwaar'awe khukileela, khwira, "Mwaakuve!" Khwira, "Owo onookhwa naanaano va." Vaphiyaly'aka iwe, Apwiya khunvonihia. Nto owo nlelo ori va eemenle. Kinoona wira owo oophwanya orilela *vanci-ene* ni sothene. Mutokweene, a khalayi, moosuwela. Owo aari muxovo yoowo wa mutthu kaamuhimy'aka, iyaakha sivinre, aalaley; ni aaphiteerya Masu awo, vano atthu yaammutheya. Nto owo ni amwaar'awe yeettaka muxipooroni ni sothene sikina, ni mmiyaakoni wu, ni mikoti sa makhala, ni woomoliwa, ni oheliwa mukhatteya, ni sothene sikina. Owo ti mulopwana owanne ekhotto wira aphpwanye etthuwo, owo ti a yaawo.

146 Vano, axinna, miyo kinooleelani wira, alakela khamurina erooho ya olamula sa mmurimani. Khamurina okhalanaka, moone, eyo—eyo khentthunaneya. Etthu yoopacerya, nyuwo mwa atthu a Masu. Nyuwo mwa ooreerelaxa, alaleyi ooreerela okivikana miyo, okhala wira miyo ka—miyo nkirinaxa ya mulaleyi. Masi miyo. . .masi nyuwo mwa—nyuwo mootikittheliwa, khula mutthu onitthaneliwa olaley a Ehapari

yooreera onniitthaneliwa waavoniha aretta; sooruma sothene ti: “Murowe mulaponi mothene mwalaleerye Ehapari yooreera soopattuxiwa sothene. Ole onrowa waamini khupatisiwa onimoopowa. Ithoonyeryo iya sinimwaatthara ale anrowa waamini. Awo yawiixaatherya matata aretta,” siiso, “awo anoopenuwa.” Mwaaitthaniwe-ene wira mukhale mulaleyi, muniitthaniwa wira mwaavekelele aretta.

<sup>147</sup> Ni mwaha ene kiniirelaaka yeela eri wira muthukumano ola . . . wira awerye woota wira kharina omulipelelaka mutthu mmosa voomeekha, Oral Roberts, Tommy Hicks, Tommy Osborn, yoomi, mutthu onrwa mwaha wa muteko w’ovoniha. Miyo kintthuna awo yoone wira nyuwo mwa axilopwana a Muluku. Munnona? Nyuwo mwa mulopwana . . . Mookhalanaxa ehaakhi yo omwiixaatherya matata khula mmosa a awo ntoko—ntoko miyo wala mutthu ti mutthu mukina. Numala sothene, axinna, nyuwo othene moosuwela, ntoko—ntoko arumeyi, ti omwaamini waya Muluku yaawo onvara muteko. Eyo ekeekhai? Hiyo ninvahererya nivekelo paahi mwaha wa yaawo.

<sup>148</sup> Vano nyuwo muniira, “Munna Branham, Erooho ya Erooho Yoowaarya eri vo ni nyuwo?” Vekeekhai. Ayo, mulopwana!

<sup>149</sup> Vano wa nyuwo vamu- . . . muliinyani vo, mwaaminiki vale ni murima wothene wira Muluku onoorowa woovonihani, nvenxe ntata, mwiire, “Miyo kinookupali.”

<sup>150</sup> Vano, murwe va, ola—muhan’ola arwe va. Miyo nkinoosuwelani, nkinatoko owoonani. Erooho Yoowaarya yakileela, wira axinn’aka va, ohoolo nno siisa, tthiri awo othene ari va vakhiviru ni miyo. Ni kahi yeeyo paahi, axinn’aka ari va, ni Pwiya aka ori vaava. Owo ti Pwiya’aya, nave. Vano, Owo akileela etthu evonyeie ni nyuwo, etthu p’itthu evonyeie ni nyuwo, munoosuwela yaari ekeekhai wala nnari. Kintthuna wira awo, kintthuna wira muthukumano, kintthuna wira atthu ota iwe yoone wira Erooho Yoowaarya eri vaava vaplataforma wira elamule sa mmurimani, masi eyo kheninvonihani hata mutthu. Masi Owo akileelaru etthu ya nyuwo, munsuwelaanyu wira nkinsuwela hat’etthu ya yeeyo, siiso ntoko yaary’aya ni muthiyana veehimeni. . . . Kahi enamuna emosaru ya mwaha, masi kinihimya mulopwana ni muthiyana ankumana emaara yoopacerya. Yesu, mulopwana mmosa ntoko a eyinnuwelo y’eriyari, ni muthiyani’ola alakela aari mwamuthiyana, khino ntoko nyuwo.

<sup>151</sup> Nto Owo atthuna vale, aamuwerya okileela etthu mukhalenlyanyu va, mukattyamiho anyu, mwaamwaamini wira yaahaana okhala Erooho Awe jaarowa wira yeeyo? Nyuwo axinna munnaamini yeeyo? Wira Pwiya Yesu yoowo omphwanyaneya vaava? Nyuwo muthukumano munnaamini siiso? Nyuwo muliinyani mwa mavekelo munimwaamini yeeyo, ni osuwela wira alopwana ala . . . ? Kaamuwiihana osulu nno

kuupuwela wira awo kahi . . . ? Nuumala olaleya siisa, ni ohimya itthu sihimalyaka, vano nto owiihana alopwana va yahaari oophwanela? Nkaakhanle wiiraka yeeyo. Miyo kaamuxintta etthu ene yeeyo kinwanelaaka. Munnona? Miyo kinniwaamini. Kinnaamini wira awo atthu a Muluku.

<sup>152</sup> Vano moone sinto Erooho Yoowaarya eri vakhiviru. Wira kilavule ni nyuwo paahi, miyo kimphavela . . . Nyuwo muniira, “Muniira exeeni, Munna Branham?” Etthu emosaru Yesu iiraly’awe ni muthiyana, iirale, “Mukiruuhele maasi kiwurye,” Owo aaphavela olavula ni yoowo minuutu mmosa, wira aphavele ole waari mulattu awe.

<sup>153</sup> Mukattiyamiho anyu ti oviruwa, ti yeeyo munihaaxeyaanyu. Yaari ekeekhai, nvenxe ntata. Vano, tthiri khonooneya okhala siiso, onnooneya, axinna? Khonooneya, masi ti yoowo okhanle mukattiyamiho awe. Owo ori siiso okathi munci-ene. Okathi wothene mulapuwaka mithato sanyu muhinatthi ophiyerya, ni itthu siiso. Eyo ekeekhai. Ti mukhalelo anyu, mpakiwe siiso tu, wuukhuleya; kweekwe muupuwelelaka wira etthu ehanle wiiraneya, nave kheniireya. Imaara sikina xetwani onnooleelani wira, “Khiiyaavo etthu wa Yeeyo, nyuwo mutthikenle ottuli paahi, nyuwo muroothweelela.” Miyo nkinisoma muupuwelo anyu, masi kinsoma ele eri . . . Miyo kinttemulela ele owo ooleenle-aweni, okhala wira kinnoona evinre mmuupuweloni mwanyu.

<sup>154</sup> Vano, Yesu aahisuwela miyuupuwelo saya. Eyo ekeekhai? Ahe, ti yeeyo yiireiye naanaano va. Eyo ekeekhai? Va, mukihye kooleleni etthu emosa, wira musuwele. Nyuwo tthiri mweemenle va mwaha wa mutthu mukina. Ti yeeyo. Eyo t’itthu ene, moone, khivaaweryaneya ovara mpakha vano. Vano, Apwiya yakuupululela vale etthu mweemelenly’anyu va, mwaha wa mutthu mukina, munimwaamini wira ka profeta Aya? Ti y’ame anyu. Munnaamini wira Muluku onniwerya okileela ole okhanle mukattiyamiho aya? Ahe, awo arina eretta ya murima, ikuru sa ephome, maluku a wamwe, ovelavela. Ti yeeyo, kehiyo? Munnona? Vano, eyo Erooho Yoowaarya, kehiyo?

<sup>155</sup> Vano, yookhala etthu va ya miyo n’axinna ala. Munnona? Etthu emosa va vano, Erooho Yoowaarya. Vano, mwaamini; nyuwo, okathi onviraahu muliinyani.

Nrowe othene nuramihe miru sahu okathi onaavekelelahu atthu ala.

<sup>156</sup> Vano, Tithi a Wirimu, ninrowa owiixaatherya matata atthu ala. Ni kinnaavekelela vano. Va ari arumeyi Anyu oomwene yeemenle va, ni hiyo othene ninrowa owiixaatherya matata aretta, okhala wira Nyuwo moohimya wira niire. Ninrowa wira mwa Nsina na Yesu Kristu. Atthu ahivire paahi vari ovira, masi awo avire avonihiwaka mwa Nsina na Yesu Kristu. Amen!

<sup>157</sup> Apwiya yooreeriheni. Vano mwaattame.



Mwa Nsina na Pwiya Yesu, munvonihe. . . Mwa Nsina na Pwiya Yesu, munvonihe munn'aka. Mwa Nsina na Pwiya Yesu, munvonihe munn'aka.

<sup>158</sup> Vano, paahi—minuutu mmosa paahi! Munnona! Munna mulopwana ni muthiyana, xeeni otthapaka okathi muthiyan'ole, olamula sa mmurimani wiireiye aya, ni akina yaaviraka kheniireya etthu? Atthu anoovira, "Ahe, kaahikhale, kaahikhalane olamula sa mmurimani, ahe, weeso nkaakhenle hat'etthu." Eyo kherina naata n'iyoy, Owo ori vaava vamosaru. Munnona?

<sup>159</sup> Mwaaviraka va, murwe nvenxale matata, mwiiraka, "Kooxukhuru, Pwiya Yesu. Miyo kinookupalini Nyuwo okhala Mpenuxa aka, ni kinrowa okhuma ni yeeyo. Mmosa w'axilopwana ala onoorowa okipatisa, miyo kinrowa mutankini mwa maasi kapatisiwe, ni kinookhuma ni osuwela wira Nyuwo moohimya wira miyo kaamwaakhela Erooho Yoowaarya."

<sup>160</sup> Moone, eyo. . . Olamula sa mmurimani nlelo ori vaava. Nlelo ori vaava, siiso ntoko. . . Va, exeeni iyo? Mulopwan'ola va? Miyo ka mmalapo wa nyuwo. Ti siiso, mulopwana? Miyo nkinoosuwelani. Onniwerya. . . Muluku akileela ole okhanle mukattyamiho anyu, nyuwo munimwaamini wira ka profeta Awe, murumeyi Awe? Munimwaamini ni murima wothene? Vaareera, mulopwana. Kooxukhuru, mulopwana. Eyo erooho yooreera saana, etthu yooreera saana. Mwa sothene, mweemenle va mwaha wa mutthu mukina. Ti yeeyo. "Owo ti musulu anyu, orina osupiwa, aaroomora nihiku nlo khunteya mwetto," eyo ti SIISO ANIHIMYA T'APWIYA! Eyo ekeekhahi? Ti yeeyo! Murowe mwaamini vano, nto owo onookhala mukumi.

<sup>161</sup> Vano, murwe mwaaminiki, atthu othene, murwe paahi. [Eliinya ya mavekelo emmala minuutu miraru ni isekuntu miloko mirarau ni thanu na tthaaru, anci-ene wa moolumo a Munna Branham khaniweya oratteene—Mol.] . . . ? . . .

Noottottopeliwa nikhale nlutte ninthuka  
Mirima sahu moophentani w'oKristu;  
Opatthana wa muupuwelo mmosa  
Ori ntoko ole Osulu.

Va ohoole wa Ehice y'Atithi ahu,  
Hiyo ninniroiha nivekelo nahu voowiilipiha;  
Woova wahu, miroromelo sahu, sootthuna sahu  
sinkhala imosaru,  
Ohakalala wahu ni ovela-vela wahu.

<sup>162</sup> Hiyo neemenle mwaha wa, anamwane a Muluku, oorakala, oohoona, oowoonyokowa. Arumeyi a Ehapari yooreera, moosuwela wira khanirina owerya wo ovoniha. Masi Pwiya'ahu Muulupale Yesu Kristu onveleliha ithoonyeryo iya, ni ompwapwela xetwani ootthunkweni. Hiyo ninnipwapwela xetwani. . . ? . . . Hiyo ninnipwapwela ohoona. . . ? . . .

163 Mwa Nsina na Yesu Kristu Mwaana a Muluku, ninvekela wira Muluku aavahe wamini wira yaamini wira mavekelo owaamini aawoopola aretta, ni Muluku onimwaavenxa, awo anookhala-tho akumi. Munivahe, Muluku Oowerya sothene, mwa Nsina na Yesu Kristu.

164 Vano, nyuwo axinna mukhume vo . . . ? . . .

165 Othene anyu akina mukhale nvekelaka vano, okathi hiyo . . . arumeyi anaavekelela yaawo, nave, vano. Hiyo ninnivekela, niniixaatherya matata.

166 Tithi a Wirimu . . .

Wa nyuwo vamuthukumanoni vo muhivolonwe muliinyani mwa mavekelo, mwiixatheryane matata mmosa ni mukhw'awe vano. Mwiixatheryane matata mmosa ni mukhw'awe.

167 Tith'ihu a Wirimu, hiyo ninruuha wa Nyuwo muthukuman'ola nimalihaka mutek'ola ni ekampaanya ela vathi va epantera ya Yesu Kristu, Mukhulupale Muulupale a namukuttho ootitikitheliwa a Muluku, Emanuweli, eemenle, ohihimunwe mw'alipa-ookhwa, onkhala mahiku othene wira alapeleke; Mukhalelo Awe muulupale vano ni hiyo, Owerya Wawe woowaarya mwa hiyo wira onooniheke soowoona, olaleerya, owiixaatherya matata aretta. Masu a Muluku ahinivonya khandthikela wa Yoowo siiyo. Miyo kinnimpwapwela khula xetwani a eretta, owerya wothene w'etampi, ohaamini wothene, mwa Nsina na Yesu Kristu, okhuma mw'atthu ni wira awo akhale akumi.

168 Mwaareerihe axinna ala alaleyi, Pwiya, vathukumanne aya mwa murima mmosa ni mwiiwanano mmosa, ni anamakhalala othene a ekereja. O Muluku Oowerya sothene, wa oMiddletown nno muulupale, Ohio, nveleelihe muhakalaliho nuumala yeela, Pwiya, onrowa ovela okhuma epantte mpakha epantte, otakanxana wa makhuva, Pwiya, mitika sa esapala. Ni wira owerya wa Muluku ovenxe ekereja yoowerya yoowiraana va epooma yeela enrowa ovela, ekereja ethoonyeryo, elapo yothene, wira atthu arweeke epooma ela wira yoone owerya wa Muluku. Munivahe, Pwiya. Mwaavonihe aretta n'ale ooxanka, nwoopole ale arimeenle, ni mphwanye ovuwa Yeenyu.

169 Munivahe, wira maleeso ala othene ni mattapwatta makhaani amphwanyaneya va . . . Miyo kinvekela, Pwiya, wira Eroho Yoowaarya mwa hiyo, ni mpaani mu ennittikitthela, wira khula mmosa a awo akhale mukumi. Yoolempwa mBibiliani wira okathi Isarayeli aary'awe mphironi mwa muteko, erowaka muttethe wa natiri, wira Ephareya Yooxeerya yaahikhala mphironi. Nto mmosa wa anamalepa ohimye wira, "Muluku aahiweha vathi mwa Nripu nle na Mooro nto Ephareya Yooxeerya yaahoova khutthikela ottuli, vano Isarayeli khurowa muttethe wa natiri waalaiheriwe."

170 Nto vano, eri mBibiliani, yoolempwa wira, “Miyo kintthuna mwa sothene mweetteke ekumi yooreera.” Nto maleeso ala yaaphiyerya atthu, vaavo Satana ohenly’awe Ephareya Yooxerya ohoolo waya, Muluku awehe vathi mwa Ephome ya Mwan’Awe, Yesu Kristu, ni apwapwele khula eretta w’ale ahiwenrye ophiya va; ni wira eretta ekhume ni yoove Masu a Muluku ni natiri a Muluku ni muttikithelo wa Muluku, ni wira atthu evire emurowelaka natiri ule ooreera a ekumi yooreera ni ikuru. Munivahe, Pwiya. Ni ninvahererya sothene wa Nyuwo, mwa Nsina na Mwan’Inyu oophenteya, Moopoli ahu Yesu Kristu. Amen.

171 Muthukumano, wa Ole onnisuwela hiyo othene, wa Ole onihihimunxe wira nikhale muxovo Awe molumwenkuni, mukereja mw’Awe, iparakha sa Muluku sikhale mwa nyuwo othene mpakha nikumane-tho. Muteko ahu ontharelana, vansuwelaahu, onrowa okhala otapernakulu, Ttiminku voosiisu, Ettiminku ya Paasikha voosiisu. Nuumala kinrowa o . . . oIllinois okhuma weiwo. Mureerihwe, mukhale mukereja mwanyu, mweetteke ikereja iya sooreera, mukhale ni murima mmosa. Mukhale Mmasuni a Muluku! Mmukhaleleke Yoowo, okhala wira sinnirwa itthu soowoopiha, muupuwele yeeyo!

172 Mpakha nikumane, nrowe nivenye niipe:

Miyo kinnimpenta Owo, miyo kinnimpenta  
Owo  
Okhala wira Owo t’opacenrye okiphenta miyo  
Nto oothuma woopowa waka  
Vamwirini w’oKalvario.

173 Vano, voottitimiha, nvahane matata ni mutthu ori ottuli wanyu, ohoolo wanyu, ni mpararini mwanyu.

Miyo kinnimpenta Owo . . .

Atthu othene vano.

. . . Miyo kinnimpenta Owo  
Okhala wira Owo t’opacenrye okiphenta miyo  
Nto oothuma woopowa waka  
Vamwirini w’oKalvario.

174 Vano ni matat’anyu munvenxenrye Muluku, mwiituperyaka vano, atthu othene arumihe.

Miyo kinnimpenta Owo, miyo kinnimpenta  
Owo  
Okhala wira Owo t’opacenrye okiphenta miyo  
Nto oothuma woopowa waka  
Vamwirini w’oKalvario.

175 Nrowe nuurame muru ahu vano.

Mpakha nikumane! mpakha nikumane!  
Mpakha nikumane munawoni wa Yesu;

Muupuwele, anci-ene a hiyo khaninrowa okumana-tho mpakha okathi yoowo.

Mpakha nikumane! mpakha nikumane!  
Muluku akhale ni nyuwo mpakha nikumane-  
tho!

<sup>176</sup> Vano mwiipe vathi-vathi. Pastore anyu. Munna Sullivan, mpakha nikumane, munn'aka. 

61-0319 Etiini ya Yesapeli  
National Guard Armory  
Middletown, Ohio wAmerika

EMAKHUWA

©2024 VGR, ALL RIGHTS RESERVED

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Olopola mwaha wa ihaakhi sa mwaneene

Ihaakhi sothene sinnaakiheriwa. Eliivuru ila pooti otthittiwa owaani wira mutthu arumeele wala okaiwa, voohilinvwa etthu, ntoko ekaruma y'olaleerya Ehapari yooreera ya Yesu Kristu. Eliivuru ila ehitumihiweke, otthittiwa eyaattelo yuulupale, oheliwa muwepisaiti, oheliwa moothukumanyiwa wira ekuxiwe-tho, otaphuleliwa ni mattaava makina, wala orumeeliwa wira ophwanyawe musurukhu vahikhanle n'utthuniheriwa woolempwa ni Voice Of God Recordings®. Mwaaphavelaka wiiwa-tho wala ikaruma sikina sikhanele, xontte mulavule ni:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

[www.branham.org](http://www.branham.org)